

Rau To Paulus Imbooda Ila To Yes Korin Muun

1 Korin—1 Corinthians

¹⁻² You Paulus. Maaron ipoi ghou nanim le, ve ighur ghou nanim mbanjoona to Yesu Krisi itaghon tau lolo. Yeru tonvetaz toit Sostenes nimbood rau tonene ilat to yam to aneep ila lupuun to Maaron izi ndug Korin. Yam aneep tunja ila to Yesu Krisi, tauto anim tamtoghon toni patabuana wa. Ye ipoi gham anim le, lesa ataghon ngar patabuan animale ye tau. Ve yam moghon maau. Ye igham tovene pa tamtoghon tisob to ndug ndug to tisuusun ila Tiina toit Yesu Krisi iza. Ye tiina todi, ve tiina toit paam. *1Kor 6:11; 2Tim 1:9*

³ Poia to Tamaan Maaron ve Tiina toit Yesu Krisi iza tiam, ve tingin gham aneep pool toman lolomim luuma. Onoon.

Paulus ipait Maaron pasa, ye ighur poia toni tiina iza to yes Korin

⁴ Sawa isob, you napait Maaron payam toman lolog poia. Pasa, ila uraat to Yesu Krisi, Maaron ighur poia toni tiina iza tiam. ⁵ Yam to aneep tunja ila to Krisi, Maaron Avuvu irei ngar popoia naol payam. Tauto aghazon pa ngar popoia naol, ve avovotia Maaron aliña ila ataam naol. *1Kor 12:7+; 2Kor 8:7*

⁶ Maaron Avuvu igham uraat toman tapiri ila lolomim. Tauto aghilaal aghaze saveen to Krisi to nisavia payam, nene onoon, ve akisi ariana.

⁷ Tovenen aazne, ambool pa tapiri, ma ngar poia

eta to Maaron Avuvu ireii pait ne maau. Ve asasaŋan aghaze le aghita sawa to Tiina toit Yesu Kriŋi imuul inim, ve Maaron ipatoona ivot ighazoon.

Pil 3:20; 1Tes 1:10; Tit

2:13

⁸Maaron tau pale ipalot gham, ve igham gham ayoon ariana le aza pa sawa to ye ighuri payam. Leso sawa to Tiina toit Yesu Kriŋi imuul inim, ye ighita gham ighaze lemim sosor eta maau. ⁹Iit irau tanumeer Maaron. Pasa, ye itaghon saveeŋ toni irau sawa isob. Ve ipoi gham anim le ve yamŋa Natu Yesu Kriŋi alup gham anim ee moghon wa.

Pil 1:6; 1Tes 5:23+; 1Pe 5:10

Paulus isaav ariana pa yes Korin ighaze tivalag di malep

¹⁰Yam tonvetaz, you naghaze napalot gham ila Tiina toit Yesu Kriŋi iza tovene: Avalag gham aneep lemim lemim malep. Yam asob alup lolomim ve ŋgar tiam inim ee moghon, ve azuaria gham pa taghoniin ŋgar ee moghon. *Ro 12:16; Pil 1:27, 2:2; 1Pe 3:8*

¹¹Yam tonvetaz, you nasavia saveeŋ tonene pasa, Kloe tamtoghon toni pida tinim, ve tipaesia varumim payou tighaze parzoraan naol tivotvot ila lolomim. ¹²Nene nasavia ŋgar tiam to avalag gham aneep lemim lemim, ve yam pida asavsav aghaze: “You nataghon Paulus,” ve pida aghaze: “You nataghon Apolos,” ve pida aghaze: “You nataghon Petrus,” ve yam pida aghaze: “You nataghon Kriŋi.” Ŋgar tonanan, yam asob aghamghami. *1Kor 3:4+*

¹³Vena, yam aghaze arab motmotin Kriŋi anona inim suruvu suruvu? Ma aghaze you Paulus

nagham inamim, ve tirab ghou izala ai pambaroon payam? Ma yam agham ya ila you izag? Maau. ¹⁴You lolog poia pa Maaron ve napaiti pasa, nagham ya pa yam ival maau. Nagham ya pa Krispus ve Gaius moghon. *Mbañ 18:8; Ro 16:23*

¹⁵Tovenen tamtoghon eta irau isaav ighaze: “Yei tonene nigham ya ila Paulus iza,” ne maau. ¹⁶O, ngaramus matag ingal. You nagham ya pa Stepanas ve yes to tineep tomani ila ruum toni ne paam. Ve yam pida, lolog imaagh. Nagham ya payam, ma maau? *1Kor 16:15*

¹⁷Pughu to you nagham ya pa yam ival maau, nene vene: Krisi imbaañ ghou pa nagham ya pa tamtoghon maau. Ye imbaañ ghou pa navotia varu poia. Ve ye ighaze sawa to navotia varu poia, you irau nasaav nanimale yes ngara to taan to tighamgham pa taudi izadi ne maau. Pasa ighaze nagham tovene, nene pale narab matin ai pambaroon to Krisi tapiri, ve tamtoghon tighita ai pambaroon toni inimale mbeb sorok. *1Kor 2:1+*

Mateen to Krisi izala ai pambaroon ipatoon ghiit ighaze Maaron ngar toni, nene ite kat pa ngar to iit tamtoghon

¹⁸Onoon, saveen to isavia mateen to Krisi izala ai pambaroon, tamtoghon to titaghon ataam to tilaledi, tighita tighaze nene saveen to borouja. Eemoghon iit to Maaron ighamgham uraat pa igham mulin ghiit ne, taghilaala taghaze saveen tonowen, Maaron tapiri ineep ila. *Ro 1:16; 1Kor 2:14; 2Kor 4:3*

¹⁹Saveenja, Maaron isavia ve timbooda pataghaan wa. Ighaze:

“Ndiran ngara to taan, you pale nawaghamun ngar todi le tiwaghamgham.

Yes to tighaze tighazon kat pa ngar tintina, you pale naghham ngar todi inim mbeb sorok, ve le anona maau.” *Is 29:14*

²⁰ Ighaze venen, pale tasaav vena pa yes ngara to taan, ve yes to ledi ngar tintina pa tutuun to Mose, ve yes to aazne tiwazoran di pa savsaveen ma ngar? Pale tapait di? Maau. Pasa, ngar to tamtoghon to taan tipakur taudi pani, nene Maaron ipatoonja ighaze nene ngar to borounja. *Lu 10:21; Ro 1:22; 1Kor 3:18*

²¹ Maaron ngar toni tiina, ve ighita ighaze poia pa ipoon ataam pa tamtoghon to taan, leso tipait taudi izadi sob. Tauto yes ngara to taan ngar todi irau iuul di pa tiwatag Maaron maau. Maaron ighaze igham mulin tamtoghon itaghon ataam ite. Nene saveen to Krisi to nivovotia. Onoon, tamtoghon to titaghon ngar to taan, tighita saveen tonene tighaze nene saveen to borounja. Eemoghon yes to tighur ila saveen tonene, Maaron pale igham mulin di. *Mt 11:25+*

²² Yes Yuda tizoorndug tighaze tighita mbeb gharatoonjadi tivot tinim ghilaloon padi, ghoru tighur ila. Ve yes Grika tizuaria di pa lonjaan saveen to yes ngara to taan to tighita tighaze le pughu tiina. *Yo 4:48; Mbarj 17:21*

²³ Eemoghon yei nivovotia saveen pa mateen to Krisi izala ai pambaroon. Saveen tonene, sawa to yes Yuda tiloonja, tirere pani ve tighur ila maau. Ve sawa to yes Grika tiloonja, tivelegi tighaze nene saveen to borounja. *Yo 6:60+; 1Kor 2:2,14*

²⁴ Eemoghon yes to Maaron ipoi di tinim le, yes

Yuda ve Griika paam, yes tighilaal tighaze Krisi ipatoon Maaron tapiri ve ngar toni tiina ivot ighazoon pait. *Ro 1:16; Kol*

2:3

²⁵ Onoon, tamtoghon to titaghon ngar to taan, tiveleg Maaron ngar toni tighaze nene inimale ngar to borouja. Eemoghon maau. Ngar toni tiina. Ilib kat pa ngar to iit tamtoghon. Ve uraat to Maaron ighami,*

tovene paam. Tamtoghon tivelegi inimale mbeb sorok, ve tighita tighaze le tapiri maau. Eemoghon uraat tonowen, tapiri tiina kat. Ilib pa iit tamtoghon tapiriid. *2Kor 13:4*

Ngar to Maaron ene ite kat pa ngar to taan

²⁶ Yam tonvetaz, agham ngar pa taumim. Sawa to Maaron ipoi gham anim le, gabuamim ne vena? Ndiran to titaghon ngar to taan, tighita tamtoghon tiam katindi tighaze ledi ngar tiina maau. Ve tighaze yes ledi izadi ve tapiridi pa ghamuun mbeb eta maau, ve sinj todi paam, ledi izadi maau.

²⁷ Tovenen aghita. Yes to tamtoghon to taan tiveleg di tighaze ledi ngar maau tinimale borouja, tauto Maaron igham di tinim le, lesu ipamayanjin ndiran ngara to taan. Ve yes to tamtoghon to taan tighita di tighaze tapiridi iraua maau, tauto Maaron igham di tinim le, lesu ipamayanjin yes to tapiridi tintina. *Mt 11:25; Yems 2:5*

²⁸⁻²⁹ Ve yes to ledi izadi maau, ve tamtoghon to taan matadi velegin di, ve tighita di tinimale mbeb sorok, tauto Maaron igham di tinim le. Leso

* **1:25:** Uraat to Paulus isavia, nene mateenj to Krisi ve mundigiin toni.

ipatoon yes to izadi tintina ighaze izadi tonowen, mbeb sorok. Pasa, ye lolo pa tamtoghon eta ipait tau iza ila mata malep. *Ro 3:27; Ep 2:9*

³⁰ Maaron tau to igham gham aneep tunja ila to Yesu Kresi. Ye ighur Yesu Kresi pa ipaghazonan ghiit pa ngar toni, leso taneep pooi. Ve Kresi to igham ghiit taneep denjaad ila Maaron mata, ve igham ghiit tanim tamtoghon toni patabuanja, ve ipas ghiit tavot pa ngar samia tapiri, leso tanim mbesoonja pani muul sob. *Ro 3:24; 2Kor 5:21; Ep 1:7; Pil 3.9*

³¹ Tovenen tataghon saveen to timbooda pataghaan wa.

“Tamtoghon to lolo pa ngar to pakuruun, ye irau ipakur Ngeu Tiina pa ngar to ye ighami.”
Yer 9:23+; 2Kor 10:17

2

Paulus isavsavv inimale yes ngara to taan maau

¹ Yam tonvetaz, matamim ingal. Sawa to nalat ve navotia Maaron aliija payam, you nasavia saveen pughu ariana inimale yes ngara to taan to tighamgham pa taudi izadi ne maau. You nasavia saveen rauraua payam, leso aghazon pa Maaron ngar toni. Ngar tonowen, muun iyoon, ve aazne ivot ighazon wa. *1Kor 1:17*

² Pasa, sawa to nalat ve naneep toman gham, ngar tiou iyaryaan naghaze nasavia Yesu Kresi varu moghon, ve mateen toni izala ai pambaroon. *1Kor 1:23; Ga 6:14; Pil 3:8*

³ Sawa to naneep toman gham, matughezaan tiina igham ghou le tinig irur. Ve nayamaan taug naghaze tapirig imbool. *Mban 18:9; 2Kor 11:30, 12:5,9*

⁴ Ve sawa to navotia varu poia payam, you nasavsaav nanimale yes ngara to taan pa naghham lolomim ne maau. Eemoghon Maaron Avuvu igham uraat toman tapiri ila lolomim. Tauto ipatoon ghou ighaze saveen to nasavia payam, nene saveen onoon. ⁵ Nataghon ataam tovene, lesongar to tamtoghon inim pughu pa ghurla tiam sob. Naghaze Maaron tau tapiri inim pughu pani, ghoru poia. *2Kor 4:20; 1Tes 1:5*

Maaron Avuvu ipaghazonan ghiit pa Maaron ngar toni

⁶⁻⁷ Eemoghon yes to ngar todi imatu pa Maaron ve saveen toni, yei nisavsaav padi pa ngar tiina to Maaron to muun iyoon ve aazne ivot ighazon. Muun kat, sawa to sambam ve taan tivot sone, ye igharaat ataam pataghaan wa, lesongam ghiit tala taneep tomani ila nguruba lolo. Ngar toni tonowen, ite kat pa ngar to yes ngara to taan tiasavia pa sawa tonene. Ve yes to tighamgham pooz pa sawa tonene*

tikankan pani paam. Yes pooza tonowen, muri Maaron pale itatan di tinim mbeb sorok. *Ro 16:25+; Ep 3:5,9; Kol 1:26; Yems 3:17*

⁸ Todi eta ighazon pa Maaron ngar toni maau. Ve inimale tighazon pani, tone irau tirab Tiina toit Yesu to iza tiina pa tapiri ve poia toni ne izala ai

* **2:6-7:** Yes pooza to Paulus isavia di, nene yes daba samsamiadi to taan, ma Ngeu Samia toman avuvu samsamiadi.

pambaroon maau. *Lu 23:34; Yo 16:3; Mbanj 13:27; 2Kor 3:14*

⁹ Ngar yongaan to Maaron to nisasavia ne, timbood saveenja pataghaan tighaze:

“Maaron igharaat mbeb popoiadi naol pa yes to lolodi ineep toni. Mbeb tonowen, ite kat. Tamtoghon eta ighita di pa mata, ma iloon varudi pa taliņa sone. Ve tamtoghon eta irau igham ngar padi paam maau.” *Is 64:4; Yer 3:16*

¹⁰ Eemoghon iit, ghoru Maaron ipaghazonan ghiit pa ngar toni yongaan tonenen ila uraat to Avuvu Patabuan wa. Maaron Avuvu ighita mbeb tisob. Ngar yongaan kat to ineep ila Maaron lolo ne paam, Avuvu ighita. *Mt 13:11; Yo 16:13*

¹¹ Laak, sei iwatag katin tamtoghon ite lolo? Maau. Ye tau moghon to iwatagi. Maaron tovene paam. Tau Avuvu moghon to iwatag katin lolo. Ite paam maau. ¹² Avuvu to iit taghami, ye itaghon ngar to taan maau. Ye ivot ila to Maaron tau. Maaron igham Avuvu pait, lesu tawatag mbeb popoia to ye irei di pait itaghon tau lolo ve poia toni.†

¹³ Tovenen yei nisavsav pa mbeb tonene. Ve ngar to nisasavia, yei nighami ila to yes ngara to taan maau. Maaron tau Avuvu to ipaghazonan ghei pani, ve ighamgham pooz pa saveen isob to nisasavia. Tovenen saveen onoon to Maaron Avuvu isavia payei, tauto nipaghazonan pughu pa

† **2:12:** Mbeb popoia to Paulus isavia di, nene mbeb to tagham di ila mateen to Krisi izala ai pambaroon. Nene mbeb tovene: Krisi ireu sosor toit, ve igham ghiit taneep denjaad ila Maaron mata, ve irei Avuvu Patabuan pait.

yes to titaghton ngar to Maaron Avuvu. *1Kor 1:17, 2:4*

¹⁴ Ighaze ngeu eta itaghton ngar to tamtoghon moghon, ye pale izurun ngar to inim pa Maaron Avuvu, ve ighita ngar tonowen inimale ngar to borouŋa. Irau ighazooŋ pani maau. Pasa, Maaron Avuvu iuul ghiit, ghoru tanŋabiiz poian ngar tone-nen, ve taghazooŋ pani. *Yo 6:44, 14:17; Ro 8:5+; 1Kor 1:18,23*

¹⁵ Tamtoghon to ighaze itaghton ngar to Maaron Avuvu, nene irau inŋabiiz poian mbeb tisob ve ighilaal di: Sa to poia, ve sa to samia. Tamtoghon tovene, yes to titaghton ngar to taan, irau tinŋabiiza maau.‡ *1Tes 5:21*

¹⁶ Pale tinŋabiiza vena? Maau. Pasa, saveeŋ ineep pataghaan wa. Ighaze: “*Sei iwatag katin ngar to Maaron, ve irau ipatooti pa ngar pida? Maau.*” *Ro 11:34*

Eemoghon iit, ghoru ngar to Krisi ineep toit. *Ro 12:2; Ep 4:23*

3

Yes Korin ngar todi imatu sone

¹ Yam tonvetaz, muuŋ you irau nasaav payam inimale nasavsaav pa yes to titaghton ngar to Maaron Avuvu ne maau. Pasa, sawa tonenen, yam akis Krisi tunja ila ngar tiam sone. Yam animale ndipain geegeu, ve ataghton ngar to lolomim muŋgina.

‡ **2:15:** Saveeŋ waaro tonene avaat inarua tamtoghon pida to Korin to tiveleg Paulus pa uraat toni, ve tiyouyou avodi pani. Ughita 2Kor 10:10.

² Tauto naghām aniin ariana payam maau. Napaghun gham pa tuz moghon. Pasa, sawa tone-nen, yam irau aghan aniin ariana maau. Ve aazne paam, naghita gham araua sone. *Hib 5:12+; 1Pe 2:2*

³ Aghita. Parzoraan naol tivotvot ila lolomim, ve ngar tiam iyaryaan aghaze atatan nditamim, ve agham di titaghon ngar tiam moghon. Nene ipatoon gham ighaze yam atataghon lolomim mungina sone. Laghoon tiam, yam animale yes to titaghon ngar to taan. *1Kor 1:10+, 11:18; Yems 3:16*

⁴ Pasa, yam pida aghaze: “You nataghon Paulus,” ve pida aghaze: “You nataghon Apolos,” Ngar tiam tonanan ipatoon gham ighaze yam ataghon tam-toghon to taan ngar todi.

Uraata tisob to Maaron tizuaria di pa mbeb ee moghon

⁵ Laak, Apolos ne sei? Ve you Paulus, sei? Yeru mbesoonja moghon to Tiina toit Yesu Kresi. Yei nigham uraat payam, tauto aghur ila toni. Onoon, ye ighur lemai uraat enaenja irau ghei. Eemoghon yeru nigham uraat pa Ngeu ee moghon. *Mban 18:1+, 18:24+*

⁶ Uraat tiou, nene inimale navazog aniin ila uum. Ve Apolos uraat toni, nene inimale igham uraat pa uum, ve igham ya ve itutur aniin. Eemoghon Maaron to igham aniin itub iza. *Mt 13:3+*

⁷ Ngeu to ivazog aniin, ve ngeu to igham ya ve itutur aniin, yesuru ledi izadi maau. Maaron moghon to ye le iza. Pasa, ye to igham aniin itub ve anonja ivot. ⁸ Tovenen ngeu to ivazog aniin, ve ngeu to ighamgham ya ve itutur aniin, uraat todi, nene

pughu ee moghon. Ve muri, Tiina todi pale igham ledi atia denja itaghon uraat todi todi. *Ro 2:6*

⁹Tovenen yeru Apolos nilup ghei ve nigham uraat to Maaron ighuri inim nimamai. Ve lupuuñ tiam, nene inimale uum to Maaron ve ruum to ye inep-neep pani. *Ep*

2:20+

Yes to tiuul lupuuñ to Krisi, tinimale ndiran to tirei ruum

¹⁰Poia to Maaron iza tiou, ve ye igham pooz pa uraat tiou. Tauto nanimale ngeu to iwatañ katin uraat to rein ruum, ve imuñmuuñ pani. Uraat to naghama ila lolomim, nene inimale napayoon gungun inim pughu pa Maaron ruum toni. Ve aazne, tamtoghon pida anadi tiseeñ uraat to rein ruum tonanan. Tovenen sei to ighaze iseeñ uraat to rein ruum to Maaron, ye irau igham ngar pooli, ve irei poian ruum itaghon ruum tau ngar toni. *Ro 15:20; 1Kor 4:15*

¹¹Tamtoghon eta irau ighur mbeb ite paam inim pughu pa ruum to Maaron maau. Yesu moghon to inim pughu pani. Ve pughu tonowen, you nagharaata wa. *Ep 2:20*

¹²Yes to tirei ruum anoña, pida tirei pa malimoon ariañadi inimale gol, silva, ve yaam popoia pida. Ve pida tirei pa malimoon to ariañadi maau inimale ai, reg, ve mbeb pida. ¹³Tala tala le ighaze taza pa sawa to gabizoon ivot, ghoros yes to tirei ruum ne, uraat todi anoña pale ivot ighazoon. Gabizoon tonowen ngara, nene inimale tamtoghon tighur mbeb ila yab, leso titoova ve tighita: Nene mbeb ariaña, ma mbeb sorok? Ighaze tirei ruum pa malimoon ariaña, nene pale

yab tonowen irau ighani maau. Eemoghon ighaze tirei ruum pa malimoon to ariana maau, nene pale yab ighan uraat todi gha ilale. *1Kor 4:5*

¹⁴ Tamtoghon to ighaze irei ruum to Maaron pa mbef ariana, gabizoon to Maaron irau igham mbef eta pa uraat toni maau. Tovenen sawa to gabizoon tonowen ivot le isob, ghoru uraat toni anona pale inepneep, ve Maaron igham le atia poia. ¹⁵ Eemoghon ighaze tamtoghon eta irei ruum to Maaron pa malimoon soroksorok, nene pale yab ighan uraat toni, ve le anona maau. Onoon, ye tau pale inep pooi. Eemoghon ye inimale ngeu to yab ighan suvun ruum toni, ve nima moghon, ve ighau ivot ila pumuri.

Lupuun to Krisi inimale rumai patabuan to Maaron

¹⁶ Yam awatag maau? Lupuun tiam, nene inimale Maaron rumai toni patabuan to ye inepneep iloon ila. Ve Maaron Avuvu inepneep toman gham ila lupuun tiam lolo. *1Kor 6:19; 2Kor 6:16; Ep 2:21+; 1Pe 2:5*

¹⁷ Tovenen apatum gham. Pasa, yam taumim animale rumai to Maaron. Ve rumai tonanan, mbef toni patabuan. Tovenen ighaze tamtoghon eta iwaghamuni, nene pale ye paam, Maaron iwaghamuni.

Pale tagham ngar vena pa Maaron uraata toni?

¹⁸ Yam agham kaarom pa taumim malep. Ighaze tiam eta ighaze ye iraua kat pa ngar to taan to aazne tamtoghon tizuaria di pani, ye irau ipul muri pa ngar tonowen, ve itaghon ngar to Krisi to ndiran to taan tighita inimale ngar to borouja.

Leso ighazooŋ pa Maaron ŋgar toni ve ataam to ineep pooli. ¹⁹Pasa, ŋgar naol to tamtoghon to taan tipakur di pani, Maaron ighita di ighaze nene ŋgar to borouŋa. Saveeŋa, timbooda pataghaaŋ wa. Isaav tovene:

“Ndiran ŋgara to taan titaghon ŋgar naol tighaze pale iuul di pa tineep pooli. Eemoghon ŋgar todi tonowen pale inim liis padi, ve Maaron iliis di.” *Yop 5:13; 1Kor 1:20*

²⁰ Ve saveeŋ waaro ite isaav ighaze:

“Maaron iwatag: Ŋgar naol to ndiran ŋgara to taan tiwazoran di pani, nene le anoŋa maau.” *Mbo 94:11*

²¹ Tovenen ŋgar to paitooŋ tamtoghon izadi, yam apuli ineep. Pasa mbep to naol, nene yam tiam. Maaron ighur di pa tiuul gham. ²² Paulus, Apolos, Petrus, taan tonene, nepooŋ tiam, mateeŋ tiam, mbep to aazne tinepneep, ve mbep to pale tivot muri ne paam. Mbep tisob tonowen, nene tiam moghon. *Ro 8:28,38-39*

²³ Ve yam to Kriisi. Ve Kriisi, ye to Maaron. *Ro 14:8*

4

Maaron pale iŋgabiiz uraata toni

¹ Tovenen tamtoghon irau tigham ŋgar pa yei uraata tovene: Yei mbesooŋa to Kriisi. Ye inumeer ghei, ve ighur saveeŋ toni inim tiei, lesu niŋgini. Saveeŋ tonene isavia Maaron ŋgar toni to muuŋ iyoŋ, ve aazne ivot ighazooŋ. *1Kor 3:5; 2Kor 6:4*

² Mbesooŋa to ighaze tiina toni inumeera ve ighur mbep ila nima pa ŋginiŋi, ye irau iŋgin poian mbep tonenen itaghon ŋgar to tiina toni. *Lu 12:42*

³ Tovenen ighaze yam, ma tamtoghon pida anğabiiz ghou aghaze you poiag, ma samiag, nene naghām nğar pani kat maau. Ve irau nanğabiiz taug naghaze you poiag, ma samiag, nene paam maau.

⁴ Onoon, matag inğal naghaze uraat tiou, naghām sosor eta maau. Eemoghon irau nanumeer sorok naghaze nğar tiou isob denja ne maau. Naneev ve nasañan gabizooñ to Tiina toıt to muri pale ivot. Ghoroye tau inğabiiz ghou. *Mbañ 23:1; 1Kor 3:13; 2Kor 10:18*

⁵ Yam tovene paam. Rikia anğabiiz tamtoghon ve aghaze yes samsamiadi, ma popoiadi malep. Aneev ve asañan sawa to Tiina toıt Yesu imuul inim. Pasa, sawa tonenen ighaze ivot, ye pale ivotia mbeb tisob to tiyooñ ila ndoroom lolo, toman nğar tisob to tineev nğozaañ ila tamtoghon lolodi, tivot tighazooñ. Ghoroye Maaron tau ipait tamtoghon enaena itaghon nğar todi todi. *Ro 2:16; 1Kor 3:8; 2Kor 5:10; Syg 20:12*

Nğar to mbañooña to Krisi titaghoni

⁶ Yam tonvetaz, saveeñ isob tonene, you nasavia iza to yeru Apolos, leso nauul gham ve agham nğar pooi pa yei to nipatoot gham pa Maaron aliña. Yam irau agham nğar inim tiei. Leso yam to apapait tamtoghon eez pa nğar toni, ve matamim izi pa ite, apul nğar tiam tonanan ineep. Pasa, ighaze agham tovene, yam amalaan pa Maaron aliña to timbooda pataghaan wa. *Ro 12:3*

⁷ Laak, yom to upait taum, sei igham ghom ulib pa nditam? Ve sa mbeb to yom ughami ivot ila taum tapirim? Maau. Mbeb tiom tisob toman sa nğar poia to ineep tiom, yom ugham di ila to Maaron.

Ighaze venen, pughu vena to tinim iza ve upakur taum inimale ngar toman mbeb tiom ivot ila to taum? *Yo 3:27; Yems 1:17; 1Pe 4:10*

⁸ Aa yam Korin, araua kat! Akaal sa mbeb muul? Pasa, yam asavsaav aghaze Maaron tapiri, yam agham katini wa. Ve aghaze aghazoon kat pa ngar toni. Ve aghaze yam anim kinik wa. Aneep ila tamtoghon eta samba muul maau.*

Eemoghon yei ghora, sone. Ve inimale saveen tiam tonanan onoon, tone poia. Leso itinja tanim kinik ve tagham pooz. Eemoghon maau. *Syg 3:17+*

⁹ You naghita naghaze Maaron ighur yei mbanjoonja nineep muri kat. Ye ninimale yes to tighaze tirab di timaat, ve tiweu di tila pa ndug to mogheraan, lesa tirab di ila ival tiina matadi. Ve yes to timbatut ghei ne, tamtoghon to taan moghon maau. Yes anjela paam. *1Kor 15:30+; 2Kor 6:4+, 11:23+*

¹⁰ Ye mbanjoonja nizuaria ghei pa taghoniin Kriisi, ve tamtoghon tighita ghei tighaze niwaghamgham ninimale boroonja. Eemoghon yam, ghoru aghaze Kriisi igham gham araua kat pa ngar! Ye tapirimai imbool, ve lemai izamai maau. Eemoghon yam, ghoru aghaze tapirimim tintina ve izamim tintina. Yam araua kat! *Mbanj 26:24; 1Kor 2:3; 2Kor 13:9*

* **4:8:** Saveen to Maaron isaav tovene: Mbonj muri, ighaze Mesia inim ve ipatoon tapiri ivot ighazoon, nene pale yesja tamtoghon toni tinim kinik ve tigham pooz pa mbeb tisob. Eemoghon tamtoghon pida to Korin ngar todi iwaghamgham. Tighaze yes to tighur ila to Kriisi ve tigham Maaron Avuvu tapiri, yes tineep tinimale yes to ndug sambam ve tinim kinik wa.

11 Muun ve inim aazne, yei pitool matmatin ghei, ve murun ghei. Ve nonogiina tiei popoia maau. Mareprepaina. Tamtoghon tighamgham samini ghei, ve lemai ruum to nepoon maau. Niwaghengheen. *Mt 8:20; 2Kor*

11:27

12 Yei nighamgham uraat ariana pa nimamai, lesu niuul taumai. Tamtoghon tipipiyaav saveen samiamia payei, eemoghon yei nighason Maaron pa ighur poia toni iza todi. Ve tighurghur patanani payei pasa, nitaghon Krisi, eemoghon yei niyoon ariana ve nimbaada.† *Mt 5:44; Mban 18:3+*

13 Tamtoghon tingalngal saveen payei, eemoghon yei nipamuul saveen poia padi. Tauto muun ve inim aazne, tamtoghon tiveleg ghei kat ve tighita ghei tighaze yei samsamiamai ninimale buzbuzz to taan. *1Pe 3:9*

Paulus ipalot yes Korin ighaze titaghoni pa ngar toni

14 Saveen tonene, you nambooda payam pa napamayanin gham ne maau. You lolog payam kat, ve naghita gham naghaze you ndinatug yam. Tauto naghaze napasaluangan gham. *1 Tes 2:11*

15 Pasa, ighaze yam lemim tamtoghon ndinndin (10,000) to tingin gham ve tipatooon gham pa ataam to Krisi, nene poia. Eemoghon nditamamim naol maau. Tamamim ee moghon to you. Pasa, sawa to navotia varu poia payam, ve aghur

† **4:12:** Grika ve Roma matadi izi pa yes to tighamgham uraat pa nimadi. Ve ighaze tamtoghon tigham ngar samia pa ngeu eta, ve iyati maau, nene paam Grika ve Roma tivelegi tighaze ye imatughez, ve le tapiri maau. Tovenen ngar to Paulus yesna mbanjoona pida titaghoni, nene igham Grika ve Roma pida tiveleg di kat.

ila to Yesu Krisi, you nanim tamamim. *Mbanj 18:11; 1 Kor 3:5+*

¹⁶ Tauto naghaze napalot gham, lesu ataghon ngar tiou. *1Kor 11:1; Pil 3:17, 4:9; 2Tes 3:9*

¹⁷ Pughu tonene to nambaan Timoti ilat. Ye, you nanumeera ve lolog pani kat. Naghita inimale natug kat. Ye ighur ila to Tiina toit ariana, ve igham uraat itaghon Krisi ngar toni. Ye pale ipei ngar tiam muul pa ataam to you naneep tunja ila to Krisi ve nataghon ngar toni. Ataam tonene, you napatooŋ lupuuŋ to Krisi pani irau ndug ndug. *Mbanj 19:22; Pil 2:19+*

¹⁸ You nawatag: Tiam pida matadi ingal tighaze you irau nalat naghita gham muul maau. Tauto tipapait taudi ve tizorzoor saveeŋ. ¹⁹ Eemoghon ighaze Tiina toit lolo pa nalat, nene pale mala maau nalat peria tiam. Pasa, naghaze naghita yes to tapapait taudi ve tizorzoor saveeŋ, lesu nawatag: Tisavsaav sorok, ma tigham uraat toman Maaron tapiri? ²⁰ Pasa, pooz to Maaron, nene saveeŋ moghon maau. Nene Maaron tau tapiri to iza to tamtoghon. *1Kor 2:4+; 1Tes 1:5*

²¹ Vena? Yam aghaze naghama sa ngar payam? Aghaze nalat toman toon ve nalos gham, ma nalat toman ngar poia ve ngar to lolood pa tauud? *2Kor 13:10*

5

Paulus iyaan yes Korin pa ngar to ghuruuŋ maat

¹ Yo, you naghaze napasalungan gham pa ngar pida to ivotvot tonanan. Tipaesia varumim tighaze ngar to ghuruuŋ maat ivotvot ila lolomim. Ve tisaav tighaze tamtoghon tiam eez ivai tau

tama azuwa. Aghita. Yes kankanooŋa to tiwatag Maaron maau, yes irau tigham ŋgar samia tovene maau. *Wkp 18:8; Ep 5:3*

² Eemoghon yam agham ŋgar eta pani maau. Apuli ve ighamgham tovene. Pughu vena to apait taumim aghaze yam araua kat pa Maaron ŋgar toni? Inimale yam awatag katin ŋgar toni, tone lolomim ipataŋan pa ŋgar to ŋgeu tonanan ighami, ve azuruni pa lupuuŋ tiam. ³ Onoon, you naneep toman gham maau. Eemoghon ŋgar tiou, nene inepneep tiam, ve Maaron Avuvu ilup ghiit inimale itiŋa tanepneep. Ngeu to igham ŋgar samia tonenen, atia to pale iza toni, you naghams ŋgar pani wa. *2Tes 3:6; 1Tim 5:20*

⁴⁻⁵ Tovenen you nasaav payam tovene: Yam irau alup gham ila Tiina toit Yesu Krisi iza, ve ila uraat to Maaron Avuvu, you pale naneep toman gham paam, ve Tiina toit Yesu tapiri iza tiam. Ghorozu azurun ŋgeu tonanan pa lupuuŋ tiam, ve aghuri ila Sadan nima, ve iyamaan katin patanaŋi to nepoon tovene. Leso itoor ŋgar toni, ve ipul ŋgar to lolo muŋgina ineep, ve sawa to Tiina toit Yesu imuul inim, ye pale igham mulin ŋgeu tonanan ve ineep pooi. *Mt 18:18+; Kol 2:5; 1Tim 1:20*

Ataam to tataghon katin ŋgar to Pasova

⁶ Ngar tiam to apapait taumim ve aghaze araua kat pa Maaron ŋgar toni, nene poia maau. Yam awatag maau? Yis ŋgiira moghon, nene irau igham palawa tiina isar. *Mt 16:6+; Ga 5:9; Yems 4:16*

⁷ Tovenen apiyaav yis tiam muŋgina isob ilale. Leso aneep animale mberet paghu to le yis maau. You nawatag: Yam animale mberet paghu to le yis

maau. Pasa, Krisi, ye inimale sipsip toit to Pasova to tirabi imaat inim watoonrau, lesu ireu sosor toit. *Igham 12:3+; Yo 1:29; 1Pe 1:19*

⁸ Tovenen iit irau tataghon ngar to Pasova irau sawa isob. Ngar samia to lolood mungina, iit tapuli ineep, inimale yes to tilup di pa Pasova, tipiyaav yis todi mungina ilale. Ve tapait Maaron toman tiniid iza, tagham ngar ngalaanja moghon, ve tataghon saveen onoon toman lolood. Leso tanim mberet paghu to le yis maau, ve tataghon katin ngar to Pasova. *Igham 12:18+*

⁹ You nambood rau eez ilat, ve nasaav payam tovene: Yes to tighurghur maat, yam aneep sagan padi. *2Kor 6:14+; Ep 5:11; 2Tes 3:6,14*

¹⁰ Saveen tiou tonowen, injarua ival tiina to taan to tighurghur maat ne maau. [Nene injarua yes to tighur ila to Krisi ve tighamgham ngar tonenen.] Pasa, ighaze yam aghaze aneep sagan pa tamtoghon tisob to taan to tighurghur maat, ma matadi mbeb, ma titombaan tamtoghon lesu tigham sorokin mbeb todi, ma timbesmbees pa maaron kaaromja, ghoru yam irau apul taan tonene! ¹¹ Tovenen saveen to nambooda payam, nene ngara tovene: Ighaze tamtoghon eta isaav ighaze ye tonvetaz to Krisi, eemoghon ighurghur maat, ma mata mbeb, ma imbesmbees pa maaron kaaromja, ma iveveleg tamtoghon ve ipiipiyaav saveen samsamia padi, ma ighunghun le iwaghamgham, ma itombaan tamtoghon lesu igham sorokin mbeb todi, nene tamtoghon tovene, agharui malep. Aneep sagan pani. Ghanghaniin paam, yamja alup malep. *Mt 18:17; Ro 16:17*

12-13 Yes to tineep ilooŋ ila lupuuŋ to Krisi maau, you leg uraat pa nanŋabiiz di maau. Maaron tau pale iŋgabiiz di. Eemoghon yes to tineep ilooŋ ila lupuuŋ toni, iit irau tanŋabiiz di pa ngar todi.

Tovenen yam irau ataghon Maaron aliŋa tonene: “*Ighaze tamtoghon samia eta ineep ila lolomim, yam azuruni ighau.*” *Lo 13:5*

6

Tapayoon tonvetaz to Krisi pa savsaveen ila daba to taan matadi malep

¹ Ighaze tiam eta ita ite igham sosor pani, pughu vena to ye ipayoonda ila yes daba to taan to tiwatag Maaron maau ne matadi? Ngar tiam tonanan, mayamim pani maau? Yam awatag: Daba tonowen, ngar todi denja ila Maaron mata maau. Tovenen yam aghur pataŋani tiam ila tamtoghon to Maaron nimadi pa tigharaata, ghoropoia. ²⁻³ Yam awatag maau? Sawa to Mboŋ Muri, iit tamtoghon to Maaron pale tauuli pa uraat to gabizooŋ tamtoghon to taan. Ighaze venen, pughu vena to yam irau agharaat pataŋani ŋgiira ŋgiira to aazne tivotvot ila lolomim ne maau? Ve iit pale tanŋabiiz yes aŋela paam. Ighaze venen, iit irau tagharaat pataŋani to taan. Pasa, nene mbeb tiina maau. *Mt 19:28*

⁴ Daba to taan ledi izadi ila lupuuŋ to Krisi lolo maau. Pughu vena to yam aghurghur pataŋani tiam to taan ila ndiran tovene nimadi pa tigharaat di? ⁵ Nambood saveen tonene payam, leso mayamim pa ngar to aghamghami. Vena, tiam eta le ngar irau to igharaat tonvetaz to Krisi saveen todi maau? ⁶⁻⁷ Eemoghon yam ataghon ataam tovene

maau. Yam apayoon tonjvetaz tiam to tighur ila to Krisi ne, ila yes daba to taan to tighur ila maau ne matadi. Ngar tiam tonanan ipatoonj gham ighaze yam atap wa. Vena, ighaze tonjvetaz tiam eta itombaan gham pa igham sorokin mbbeb tiam, ma igham sosor ite paam payam, irau apul sosor toni maau? *Mt 5:39+; Ro 12:17+; 1Pe 3:9*

⁸ Eemoghon yam ataghon ataam tovene maau. Pasa, tonjvetaz tiam to yamja aneep ila lupuun to Krisi lolo, tauto aghamgham sosor padi, ve atombaan di pa ayou sorokin mbbeb todi.

⁹ Yam awatag maau? Ighaze tamtoghon eta ighamgham ngar to denja maau, ye irau itaghon Maaron pooz toni ve iloonj ila ndug toni ne maau. Tovenen agham kaarom pa taumim malep. Yes to matadi samia tinimale ngavuun, yes to timbesm-bees pa maaron kaaromja, yes to tighurghur maat, nditamoot to timomogheer pa nditadi nditamoot pida, ¹⁰ yes yubyubja, yes to matadi mbbeb, yes ghunuunja, yes to matadi izi pa nditadi ve tipipiyaav saveej samsamia padi, ve yes to titombaan tamtoghon pa tigham sorokin mbbeb todi, tamtoghon tisob to tighamgham tovene, yes irau titaghon pooz to Maaron ve tiloonj tila ndug toni ne maau. *Ga 5:19+; Ep 5:5; Hib 12:14; Syg 21:8, 22:15*

¹¹ Muun, yam pida ataghon ngar tovene paam. Eemoghon aazne, ila uraat to Yesu Krisi, Maaron Avuvu igham uraat payam. Tauto Maaron igham gham angalaan, ve anim tamtoghon toni patabuanja, ve aneep denjamim ila mata wa. *1Kor 1:2; Ep 2:1+; Kol 3:7+; Tit 3:3+*

Anonjaad, nene inimale rumai to Avuvu Patabuanj

¹² Yam pida asavsav aghaze: “You irau naghram ngar to naol ne. Mbeb eta le ngalsekiin maau.” Nanan poia. Eemoghon ngar tisob irau tiuul ghiit maau. Ve mbeb ite paam. You lolog pa mbeb samia eta igham pooz payou ve nanim mbesoona pani ne maau. *Yo 8:34; 1Kor 10:23*

¹³ Ve yam pida asavsav aghaze: “Aniin, nene mbeb to apood. Ve apood ineep pa aniin izila. Ve muri, Maaron pale ipasob mbeb ru tonenen.”* Saveen tiam tonanan onoon. Eemoghon anonaad ineep pa igham ngar samia inimale ngavuun maau. Anonaad ineep pa imbees pa Ngeu Tiina. Ve Ngeu Tiina igham ngar tiina pa anonaad. *1Tes 4:3+*

¹⁴ Aghita. Maaron ipamundigin Tiina toit Yesu pa mateen wa. Ve muri, Maaron tapiri pale ipamundigin ghiit paam pa mateen ve igham leed anonaad paghu. *Ro 8:11; 2Kor 4:14; Ep 1:19+*

¹⁵ Yam awatag maau? Anonamim, nene inimale Krisi anona pida pida. Vena, ighaze tagham Krisi anona pida ve talupi toman liva to ataam, pale poia? Maau kat! *1Kor 12:27*

¹⁶ Yam awatag maau? Ighaze tamoot eta ipaak anona ila liva to ataam anona, nene yesuru tilup di tinim ee moghon. Saveena ineep pataghaan wa: “*Yesuru pale tilup di tinim ee moghon.*” *Mbnp 2:24*

* **6:13:** Saveen to aniin ve apood, nene iza to nditamoot ve ndiliva anonadi. Ival tiina to ndug Korin matadi samsamia tinimale ngavuun. Ve ngar todi iwaghamgham tighaze ndiliva anonadi, nene ineep pa nditamoot timogheer padi moghon. Ve sa ngar to ighaze tamtoghon tigham pa anonadi, nene mbeb sorok. Irau igham mbeb eta pa anunudi maau. Pasa, muri, anonadi pale imaat ve ilale, ve anunudi moghon, ghoru ineep mata iyaryaar.

¹⁷ Eemoghon tamtoghon to inim Tiina toit le ne, ila uraat to Maaron Avuvu, yesuru Krisi tilup di tinim ee moghon. Vena, tamtoghon tovene irau ilup tau toman liva to ataam muul? Nene pale maau. *Yo 17:21+; 1Kor 12:13; Ep 4:4*

¹⁸ Tovenen ngar to mataad samia tanimale ngavuun, yam aneep saganu panu. Pasa, ngar tonene raraate inimale sosor pida maau. Sosor toit pida tinjarua tauud anonjad maau. Eemoghon tamtoghon to ighaze igham ngar tonene, nene igham sosor pa tau anonja. *Ep 5:3; 1Tes 4:3; Hib 13:4*

¹⁹ Yam awatag maau? Anonjamim, nene inimale rumai to Avuvu Patabuanj ineep iloonj ila. Pasa, Maaron igham Avuvu payam, ve aazne ye ineep ila lolomim. Tovenen yam angin taumim muul maau. *Ro 14:7+; 1Kor 3:16+; 2Kor 6:16*

²⁰ Maaron ighol gham anim le wa. Tovenen sa ngar to ighaze aghami pa anonjamim, yam irau aghami pa apait Maaron iza. *1Kor 7:23; Pil 1:20; Hib 9:12; 1Pe 1:18+*

7

Vaiuunj ngara pida

¹ Yo, naghaze napamuul saveenj pida to ambooda ila rau tiam. Yam asaav tovene: “Ighaze tamoot eta itut liva eta maau, nene poia.”

² Eemoghon ngar to ghuruunj maat, nene ivot inim tiina. Tovenen ighaze tamoot eta yesuru azuwa tineep saganu pa taudi, ve tilup di pa ghenoonj maau, nene poia maau. Poia pa yesuru tilup di.

³ Vaivainja irau titaghon vaiuunj ngara. Ighaze liva eta ighason azuwa ighaze yesuru tigheen, nene

tamoot irau iyok pani. Ve tamoot tovene paam. Ighaze ighason azuwa ighaze yesuru tigheen, nene liva irau iyok pani. *Igham 21:10*

⁴ Liva ingin tau anona maau. Azuwa tamoot to ingini. Ve tamoot tovene paam. Ye ingin tau anona maau. Azuwa liva to ingini. ⁵ Tovenen yam vaivainja anguruut taumim pa ndizwamim malep. Eemoghon ighaze yamru azuwam aghaze asapaar pa taumim, leso apul soso ris pa sunuun, nene poia. Eemoghon muri, yamru irau alup gham muul. Pa vene, irau atatan ghaara tiam maau, ve Sadan iwat gham ve atap. ⁶ Saveen to nasavia pa saporoon, you nasavia pa naghman gar payam moghon. Ve napariaanja inim tutuun pa ataghoni ne maau. ⁷ You naghaze le tamtoghon tisob tivai maau tinimale you, ghoru poia. Eemoghon Maaron ighur leed nepoon naol naol. Tauto pida tivai, ve pida tivai maau. Ve sa nepoon to ye igham pait, nene poia toni pale ineep toman ghiit. *Mt 19:11+*

Saveen injarua yes osa ve ndinaara

⁸ Yo, yam osa ve ndinaara, you nasaav payam tovene: Ighaze avai muul maau, ve aneep animale you, ghoru poia. ⁹ Eemoghon ighaze yam irau atatan ghaara tiam maau, avai lak. Pa vene, ghaara tiam ipazaagh gham ve agham sosor. *1Tim 5:14*

Vaivainja irau tipul ndizwadi maau

¹⁰ Ve yam vaivainja, you naghur tutuun tonene payam: Liva eta irau ipul azuwa ve irab motin vaiuun toni maau. Saveen tonene, nene you taug saveen tiou maau. Nene Tiina toit tau aliya. ¹¹ Ve

ighaze liva eta ipul azuwa ve irab motin vaiuun todi, ye irau ivai muul maau. Ineep moghon. Ve ighaze maau, ye irau imuul ila to azuwa mungina, ve yesuru tilup di muul toman lolodi ee moghon. Ve yes nditamoot tovene paam. Tizurun ndizwadi malep. *Mal 2:16; Mt 5:32; 19:3+; Mk 10:11+*

Saveen pida to injarua yes to ndizwadi tighur ila maau

¹² Ve yam pida to ndizwamim tighur ila to Krisi maau, you nasaav payam tovene. Ighaze tonvetaz eta to Krisi azuwa ighur ila maau, ve liva iyok pa nepoon todi tonowen, nene tamoot tonenen irau irab motin vaiuun todi maau. Saveen tonene, nene Tiina toit aliņa maau. Nene you ngar tiou.

¹³ Ve ighaze liva eta azuwa ighur ila to Krisi maau, ve tamoot iyok pa nepoon todi tonowen, nene liva tonenen paam irau irab motin vaiuun todi maau.

¹⁴ Pasa, liva ma tamoot to ighaze ighur ila, ye inim ataam pa azuwa to ighur ila maau ne, leso inim Maaron le. Ighaze maau, tone ndinatumim tisami ila Maaron mata. Eemoghon maau. Pasa, yam ndamomim padi, tauto tinim Maaron le.

¹⁵ Eemoghon ighaze tonvetaz eta to Krisi azuwa ighur ila maau, ve azuwa tonenen ngar toni iyaryaņ kat ighaze irab motin vaiuun todi, nene ye to ighur ila, irau iyok pani, ve ipuli ila. Ngar tovene, le ngalsekiin maau. Pasa, Maaron ighaze iit tataghon ngar luuma. *Ro 12:18, 14:19*

¹⁶ Yom liva to ughur ila, uwatag maau. Pale unum ataam pa azuwam tamoot ve Maaron igham mulini. Ve yom tamoot tovene paam. Uwatag maau. Pale unum ataam pa azuwam liva, ve Maaron igham mulini. *1Pe 3:1*

Sa nepooŋ to Maaron igham pait, nene lolood poia pani moghon

¹⁷ Sa nepooŋ to Tiina toit ighuri pait, nene lolood poia pani moghon. Tovenen nepooŋaad to taghami indeeŋ sawa to Maaron ipoi ghiit tanim le, iit tayok pani moghon. Saveeŋ tonene, you napatoot lupuuŋ to Krisi pani irau ndug ndug.

¹⁸ Tovenen ighaze ŋgeu eta tiziri, ve muri Maaron ipoi inim le, nene ŋgeu tonenen ikaal ataam pa tigharaat tini malep. Ve ighaze ŋgeu eta tiziri maau ve Maaron ipoi inim le, ye igham ŋgar pa ziriin malep. ¹⁹ Pasa, ighaze tizir ghiit, ma tizir ghiit maau, nene mbeb sorok. Ve ŋgar to taghoniin Maaron tutuuŋ toni, nene mbeb tau. *Ro 2:25; Ga 5:6, 6:15*

²⁰ Tovenen sa nepooŋ to tamtoghon eŋaeŋa tighami indeeŋ sawa to Maaron ipoi di tinim le, yes irau lolodi poia pani ve tineep tovene.

²¹ Ighaze yom mbesooŋa sorok, ve Maaron ipoi ghom unum le, lolom ipataŋan pa uraat tiom malep. Eemoghon ighaze ataam poia eta ivot pa upas taum pa uraat tiom tonanan, nene poia. Utaghoni moghon. ²² Pasa, ighaze tamtoghon eta inim mbesooŋa sorok, ve Tiina toit ipoi, nene tamtoghon tonenen inim mbesooŋa muul maau. Onoon, uraat to mbesooŋa, ye pale ighami.

Eemoghon Krisi ipasi pa samia tapiri to muuŋ ikisi, ve ye inim Krisi le wa. Ve tamtoghon to ighaze ye mbesooŋa maau ve inŋin tau, ve Krisi ipoi inim le, ye mbesooŋa to Krisi. *Yo 8:36; Ga 3:28; Kol 3:24; 1Pe 2:16*

²³ Aghita. Maaron ighol gham anim le wa. Tovenen anim mbesooŋa pa ŋgar to tamtoghon malep.

1Kor 6:20; 1Pe 1:18+

²⁴ Tovenen yam tonjvetaz, sa nepoonj to iit enjaenja taghami indeenj sawa to Maaron ipoi ghiit tanim le, iit irau tineep tunja ila to Maaron, ve tataghoni tovene gha ila.

Saveenj injarua yes to tivai sone

²⁵ You leg saveenj pida pa yes to tivai sone. Saveenj tonene, nene tutuunj to Tiina toit maau. Nene taug ngar tiou. Eemoghon Tiina toit igham poian ghou, ve igham leg ngar. Tovenen yam irau aghur ila saveenj tiou tonene, ve ataghoni.

²⁶ Aazne, iit taneep ila sawa to patajani. Tovenen you naghita naghaze sa nepoonj to aazne iit enjaenja taghami, nene poia pa taneep tovene gha tala. ²⁷ Tovenen ighaze yom uvai wa, ukaal ataam pa urab motin vaiuunj tiam ve uzurun azuwam malep. Uneep toman azuwam tonanan. Ve ighaze uvai sone, uzuaria ghom pa vaiuunj malep. ²⁸ Eemoghon ighaze uvai, nene poia paam. Ugham sosor maau. Ve ndiliva papaghu paam. Ighaze tivai, yes tigham sosor maau. Eemoghon you nawatag: Nepoonj to vaivainja, yes pale tindeenj patajani naol. Ve lolog pa patajani tovene igham gham malep. Tauto nasavia saveenj tonene payam.

Tagham ngar tiina pa mbeb to taan malep

²⁹ Yam tonjvetaz, saveenj tiou tonene, pughu tovene. Sawa inim igharau wa. Tovenen aazne ve ila, tagham ngar tiina pa nepoonj toit to taan malep. Tovenen vaivainja nditamoot, yes irau tineep tinimale yes to ledi ndizwadi maau. *Ro 13:11+; 1Kor 10:11; 1Pe 4.7*

³⁰ Ve yes to lolodi ipatañan, yes irau tineep tini-male yes to lolodi ipatañan maau. Ve yes to lolodi poia, yes irau tineep tinimale yes to lolodi poia maau. Ve yes to tigholghol ledi mbeb, yes irau tigham ñgar tovene: Mbeb tonowen, nene mbeb to taudi, leso tikisi mala ne maau. ³¹ Ve yes to tighamgham uraat pa mbeb to taan, nene ñgar todi ineep ila mbeb tonowen kat malep. Pasa, iit tawatag: Taan tonene toman taan ñgara, nene irau ineep le alok maau. Ighaze isob tonene. *2Pe 3:11+; 1Yo 2:15+; Syg 21:1*

³² You naghaze patañani naol to taan igham lolomim imbumbu ve agham ñgar naol malep. Tauto nasavia saveeñ tonene. Ngeu paghu to ighaze ighur ila to Kriisi, nene ighamgham ñgar tiina pa Tiina toit ve uraat toni, ve izuarria tau ighaze le igham Kriisi lolo poia. ³³ Eemoghon ngeu vaivaiñ, ye ighamgham ñgar naol pa mbeb to taan, ve izuarria tau leso igham azuwa lolo poia. *Lu 14:20*

³⁴ Tovenen ñgar toni inim ru. Ve yes ndinaara ve ndiliva papaghu to tighur ila to Kriisi, tovene paam. Tighamgham ñgar pa Tiina toit ve uraat toni, ve tighaze le tighur ñgar todi ve lolodi, toman anoñadi isob ila pani. Eemoghon ndiliva vaivaiña, yes tighamgham ñgar naol pa mbeb to taan, ve tighaze tigham ndizwadi lolodi poia. *1Tim 5:5*

³⁵ Saveeñ tiou tonene, nasavia pa nangalsekin gham pa vaiuun maau. Nene nasavia pa nauul gham, leso ñgar tiam inim ru sob, ve apul tau-mim kat pa Tiina toit ve uraat toni, ve ataghon ñgar denja moghon ila mata. ³⁶ Ighaze ngeu eta igham ñgar ighaze ye irau ivai maau, eemoghon

muri, mata ingal ighaze ngar to igham pa liva to tisia pani, nene denja maau, ve ngar toni iyaryaan ighaze ivaii, nene poia pa itaghon ngar toni, ve yesuru tivai. Nene sosor maau. ³⁷ Eemoghon ighaze ngeu eta ngar toni iyaryaan ighaze ivai malep, ve irau itatan ghaara toni, ve ighaze tamtoghon eta ingalsekini pa vaiuun maau, ve ye itaghon tau lolo ve ivai maau, ye igham ngar poia. ³⁸ Tovenen ngeu to ighaze ivai, nene igham ngar poia. Ve ngeu to ighaze ivai maau, nene igham ngar poia kat.*

Hib 13:4

³⁹ Ighaze liva vaivain eta azuwa ineep mata iyaryaar, liva tonenen irau irab motin vaiuun todi maau. Ye irau ineep toman azuwa. Ve ighaze muri azuwa imaat, ve liva tonenen ighaze ivai muul, nene poia. Ye igham sosor eta maau. Eemoghon ivai sorok malep. Ye irau ighita le ngeu eta to ighur ila to Tiina toit, ghoru ivaii. *Ro 7:2+; 2Kor 6:14*

⁴⁰ Eemoghon you naghita naghaze: Yes ndinaara to tivai muul maau, ve tineep sorok, yes pale tinidi iza ve poia tiina to Maaron iza todi ilib pa yes to tivai muul. Saveen tonene, you naghita naghaze Maaron Avuvu igham pooz payou ve nasavia.

* **7:38:** Tamtoghon pida to Korin avaat tigham ngar tighaze ngar to vaiuun, nene poia kat ila Maaron mata maau. Tauto Paulus imbood saveen tonene. Ngara pida, matadi ingal tighaze saveen tonene injarua Korin pida to tiyokia ndinatudi liva pa vaiuun maau. Ve ngara pida tighaze saveen tonene injarua ndiran pida to tisia ndiliva padi, eemoghon yes rikia tivai di maau. Tovenen ndiliva tonowen tisanjan tisanjan le ndaman todi izala wa. Ve ngara pida tighaze saveen tonene injarua tamtoghon pida to tivai, eemoghon yesnja ndizwadi tiluplup di pa ghenoon maau. Pasa, timatughez: Ighaze yesnja ndizwadi tilup di pa ghenoon, nene pale ipoon di pa Maaron.

8

Paulus isavia watoonrau to tamtoghon tigham di pa maaron kaaromnja

¹ Yo, naghaze nasaav ris pa mbeb to tigham di tinim watoonrau pa maaron kaaromnja.

Yam pida asavsaav aghaze: “Yei nisob lemai ngar. Nikankaan pa mbeb tonowen ngara maau.” Nene poia. Eemoghon apatum gham. Pasa, ngar toit igham ghiit tapait tauud ve taghaze talib pa nditaad pida. Eemoghon ngar to lolood pa tauud, nene igham ghiit takaal ataam pa tauul nditaad ve tapalot di.

Mbanj 15:20; Ro 14:3

² Ighaze tamtoghon eta igham ngar ighaze ye iraua kat pa ngar, nene ipatoonja ighaze ye igham ngar iraua sone.

1Kor 3:18, 13:12; Ga 6:3

³ Eemoghon ighaze tamtoghon eta lolo pa Maaron, nene Maaron iwatagi ve ighami inim le wa.

⁴ Yo, yam aghason ghou aghaze irau taghan mbeb to tirab di tinim watoonrau pa maaron kaaromnja, ma maau?

Iit tawatag: Maaron kaaromnja to naol ne, nene Maaron tau maau. Nene mbeb anunudi sorok. Pasa, Maaron ee moghon to inepneep. Ite paam maau.

1Kor 10:19+; Ga 4:8; Ep 4:5+

⁵ Onoon, tamtoghon tighur ila to mbeb naol naol to sambam paronjanian ve taan, ve tiwaat di tighaze maaron todi ve tiina todi. ⁶ Eemoghon iit, ghoro taghur ila to Maaron ee moghon. Ye Tamaan to inim pughu pa mbeb tisob, ve iit taneep pa tambees pani. Ve taghur ila to Tiina toit ee moghon. Nene Yesu Kresi. Ye to inim ataam pa mbeb tisob ve tivot, ve ye to inim pughu pa nepoonj toit. *Yo 1:3+; Mbanj 17:28; Ro 11:36; Pil 2:11*

⁷ Eemoghon tamtoghon pida to ghurla todi iyaryaan sone, tighilaal mbeb tonene maau. Pasa, muun ve inim, timbesmbees pa maaron kaaromna. Tovenen aazne, ighaze tighan mbeb eta to tighami inim watoonrau pa maaron kaarom eta, nene tiyamaan taudi tighaze tigham sosor ve tisami ila Maaron mata.* *Ro 14:23; 1Kor 10:28+*

⁸ Onoon, mbeb to naol ne, ighaze taghan di, ma taghan di maau, nene irau igham ghiit tagharau Maaron, ma ipoon ghiit pani ne maau. Pasa, mbeb tovene irau igham ghiit tanim popoiaad, ma tasami ila Maaron mata ne maau. *Mk 7:19; Ro 14:14*

⁹ Eemoghon yam to aghazoon pa mbeb tonene, ve awatag aghaze yam irau aghan mbeb to naol ne, apatum gham. Pasa, ighaze aghan mbeb to tighami inim watoonrau pa maaron kaarom eta, ve yes to ghurla todi iyaryaan sone tighita gham, nene pale agham di titap pa ghurla todi. *Ro 14:13+; Ga 5:13*

¹⁰ Yom to ughazoon pa Maaron ngar toni, ighaze ughan iloon ila rumai to maaron kaarom eta, nene poia. Eemoghon ighaze ngeu eta to ghurla toni iyaryaan sone ve imatughez pa ghaniin mbeb tovene, ighita ghom, nene pale ipazaagha pa ghaniin mbeb tonowen paam. Tovenen muri, ye pale iyamaan tau ighaze ye igham sosor ila Maaron mata. ¹¹ Upatum ghom wa? Ngeu

* **8:7:** Sawa to yes to tikankaan pa Maaron tigham watoonrau, ndiran to watoonrau tirab mbeb tonowen, ve timoz minda suruvu izala artaal iloon ila rumai to maaron kaarom tonowen. Ve suruvu, nene yes to tila pa sunuun, tighami tivot tila pumuri, ve timozi ve yesna nditadi pida tighani, ma tighami tila nal ina, lesu tamtoghon tigholi.

to ghurla toni iyaryaan sone ve imatughez pa ghaniin mbeb tovene, ye tonvetaz tiom to Krisi imaat pani. Eemoghon ngar to ughami, nene iwaghamuni. ¹² Yam irau matamim ingal tonvetaz tiam pida to ghurla todi iyaryaan sone. Ighaze agham di tiyamaan taudi tighaze tigham sosor ve lolodi ipatajan, yam agham sosor padi, ve agham sosor pa Krisi paam. ¹³ Tovenen ighaze mbeb eta to taghani, irau igham tonvetaz tiou eta to Krisi itap pa ghurla toni, nene irau naghan mbeb tonenen muul maau. Pa vene, naghham tonvetaz tiou tonenen itap ma venen. *Ro 14:19+*

9

Pughu to Paulus izurun atia to yes Korin tighaze tigham

¹ You tonene, tamtoghon eta ingin ghou maau. Nanjin taug. Ve izag pa uraat to mbanjoona, ve naghita katin Tiina toit Yesu. Ve uraat to naghami toman Tiina toit tapiri, anoja toni nene lupuun tiam. Yam Korin aghilaal mbeb naol tonene, ma maau?

Mbanj 9:3+; 1Kor 3:5+, 4:15

² Onoon, tamtoghon pida tighita ghou tighaze you mbanjoona tau to Krisi maau. Eemoghon yam, ghoru awatag. Pasa, uraat to naghami ila lolomim ve ighur anoja ivot, tauto ipatoon ghou ighaze you mbanjoona tau to Tiina toit.

³ Yes to tingabiiz ghou tighaze you mbanjoona tau maau, you napamuul saveen todi tovene: ⁴ Vena, yei to nighamgham uraat to Tiina toit ne, lemai izamai pa nigham aniin ve ya inim uraat tiei atia, ma maau?

Lu 10:8

⁵ Onoon, yei uraata pida nivai maau. Ve inimale nivai ve ndizwamai tighur ila, tone irau nigham di ve yeiņa nilaghlaagh pa uraat to Krisi inimale Petrus toman mbanooņa pida ve Tiina toit nditazi tighamghami. ⁶ Ma vena, yam aghaze yeru Banabas moghon nigham uraat pa nimamai, leso niuul taumai pa nepooņ tiei, ve yes pida maau?

⁷ Agham ngar pa yes ndaaba. Todi eta ikaal yaam ve aniiņ, leso iņgin tau pa nepooņ toni? Maau. Ve ighaze tamtoghon eta ivazog vaen, pale tau irau ighan anooņa maau? Maau. Ye pale ighan. Ve vena, nġiniin to sipsip ve mekmek irau igham tuz todi ve ighun, ma maau? *2Tim 2:6*

⁸⁻⁹ Vena, saveeņ tiou tonene, you nataghon ngar to tamtoghon ve nasavia? Maau. Pasa, tutuun to Mose isavia saveeņ raraate tovene: *“Ighaze bapolo ighamgham uraat pa vazaguun wit leso uli imalab, yom upoon avo malep. Ye paam irau ighan a aniiņ.”* *Lo 25:4; 1Tim 5:17+*

Vena, Maaron igham ngar pa bapolo moghon, ve ighur tutuun tonene? ¹⁰ Maau. Ye isavia saveeņ tonene iņarua ghiit paam. Aghita. Yes to timbut taan pa vazogiin aniiņ, ve yes to tindou wit ve tigham uraat pa walabuun uli, yes irau tigham adi aniiņ anooņa pida inim ndamodi, ghoru poia. Pughu tonene to timbood tutuun tonene pait.

¹¹ Sawa to nigham uraat ila lolomim, yei nivazog uuv popoia to Avuvu Patabuan. Tovenen ighaze yei nigham ulaan pida ilat tiam, nene denja. Ma vena? Aghita aghaze yei nighur matamai payam pa mbeb tiina eta? *Ro 15:27; Ga 6:6*

¹² Ndiran pida, yam aghita di aghaze yes ledi izadi pa tigham ulaan ilat tiam. Nene poia. Ngar

tonanan denja. Eemoghon yei, ghoru denja kat pa nigham ulaan pida ilat tiam.

Eemoghon muun ve inim, yei niyok payam pa auul ghei maau. Pa vene, ipoon ataam pa varu poia to Krisi. Onoon, ataam to nitaghoni pa uraat tiei, nene igham patanani payei. Eemoghon sa patanani to ighaze ivot payei, yeru irau nimbaada. *Mban 20:33+; 1Tes 2:9*

¹³ Yam awatag maau? Yes to tighamgham uraat ila Rumai to Maaron lolo, tighanghan aniiñ to rumai. Ve ighaze tamtoghon tigham mbeb eta inim watoonrau, nene tighur mbeb tonenen suruvu izala artaal inim watoonrau, ve suruvu izi pa yes to tighamgham uraat pa watoonrau, lesu tighani. *Wkp 6:16,26; Lo 18:1*

¹⁴ Yes to tivovotia varu poia, tovene paam. Tiina toit ighur tutuun pait ighaze: Yes irau tigham ledi atia pa uraat todi to votiaan varu poia. Lesu iuul di pa nepoon todi. *Lu 10:7; 1Tim 5:17+*

¹⁵ Tovenen you leg izag pa naghams leg atia pa uraat tiou. Eemoghon muun ve inim, nayok pa ngar tovene maau. Ve aazne paam, nambood saveen tonene pa napamundigin gham, lesu agham leg atia ne maau. Lolog pa ngar tovene maau kat. Pasa, ataam to nataghoni pa uraat tiou, tauto igham ghou tinig iza. Tovenen sawa to nanee matag iyaryaar, irau nayok pa agham leg ulaan eta ne maau. Aneep namaat nala, ghoru sa to aghaze aghami, aghamghami lak! *Mban 18:3, 20:34; 2Kor 11:10*

¹⁶ Ighaze you navotia varu poia, nene leg pughu eta pa napakur taug ne maau. Pasa, Maaron tau ighur uraat tonene inim nimag. Tovenen you irau

naghami. Ighaze navotia varu poia maau, nene nakaria taug wa. *Yer 20:9; Mbanj 26:16+; Ro 1:14+*
 17 Ve inimale nataghon taug lolog ve naghama uraat tonene, tone naghama ngar pa leg atia. Eemoghon maau. Pasa, nanim mbesoona to Maaron, ve ye inumeer ghou ve ighur uraat tonene inim nimag. *1Kor 4:1; Ga 2:7; Kol 1:25*
 18 Tovenen sa to pale naghama inim leg atia? Atia tiou, nene vene: Sawa to navotia varu poia pa tamtoghon, you napoi pa atia to izag pani ne maau. Naghama uraat padi sorok. Ve ngar tonene, to ighama ghou tinig iza ve lolog poia. Atia tiou, tau tonene.

Paulus itaghon tamtoghon gabuadi, lesa ighereb di tinim Krisi le

19 You tonene, tamtoghon eta ingin ghou maau. Nanjin taug. Eemoghon taug lolog ve nanim mbesoona pa tamtoghon tisob, lesa naghareb tamtoghon katindi tinim Krisi le. *Mt 20:26+; Ga 5:13*

20 Tovenen sawa to naneep toman yes Yuda, you nataghon di pa gabuadi, lesa naghareb di tinim Krisi le. Onoon, you naneep ila tutuunj todi samba maau. Eemoghon sawa to naneep toman di, naneep nanimale yes to tineep ila tutuunj samba, lesa naghareb di tinim Krisi le. *Mbanj 16:3, 21:26*

21 Ve sawa to naneep toman ndug ndug to tikankaan pa tutuunj to yes Yuda, you nataghon gabuadi, ve naneep nanimale yes to tikankaan pa tutuunj tonowen. Pasa, naghaze le naghareb di paam tinim Krisi le. Eemoghon you nazoor tutuunj to Maaron maau. Pasa, you naneep ila tutuunj to Krisi samba. 22 Ighaze naneep toman

yes to ghurla todi iyaryaan sone, you nataghon di pa gabuadi ve nepoon todi. Leso napamundigin ghurla todi ve tineep tunja ila to Krisi. Tovenen you nataghon tamtoghon tisob gabuadi ve nepoon todi, lesa naghama mulin tamtoghon todi pida. Sa ataam to irau iuul di, nene you nataghoni. *Ro 15:1+; 1Kor 10:33*

²³ Tovenen ngar tisob to nataghon di, you naghama di lesa varu poia ilaan irau tamtoghon tisob, ve yeina nighita poia to Maaron iza tiei.

Mataad iza pa landoon to Maaron

²⁴ Iit tawatag: Ighaze landoon eta ivot, nene tamtoghon to landoon tonenen pale tisob tilaan. Ve tamtoghon todi ee moghon, to pale ilaan le ilib pa ndita, ve ighama le atia. Tovenen matamim iza pa landoon to Maaron, ve alaan toman tapirimim. Lesa alib ve aghama lemim atia poia. *Pil 2:16, 3:14; 2Tim 4:7+; Hib 12:1*

²⁵ Tamtoghon tisob to tighaze tilaan pa landoon eta, tisapaar pooi pa mbeb naol naol. Lesa tilaan toman tapiridi. Ve atia to tizuaria di pani, nene ineep mala maau. Rikia moghon ve isami. Eemoghon iit, ghoru tazuaru ghiit pa atia poia to pale ineep le alok. Irau isami maau. *1Tim 6:12; 2Tim 2:5; Yems 1:12; 1Pe 1:4*

²⁶ You nanim tamtoghon to ilandaad ve mata in-esnes maau. Matag denja pa ndug to landoon ila isob pani, ve nalaan nanarua. Ve you nanimale ngeu to iparab ve ipiyaav nima soroksorok maau. You nanimale ngeu to ipiyaav nima, ve irab katin tamtoghon. ²⁷ You narab katin taug anonag, lesa natatan ngar samsamia to lolong munjina. Pasa,

namatughez. Ighaze navotia Maaron aliņa pa tamtoghon, ve ņgar tiou pida isosor, nene pale muri tigham atia tiou ila pa tamtoghon ite, ve naneep sorok. *Ro 13:14; Pil 3:13+; Kol 3:5*

10

Ighaze tagham sosor; Maaron pale ighur atia pait inimale muuņ igham pa yes Israela

¹ Yam tonvetaz, you naghaze matamim iņgal muul pa mbeb to muuņ ivot pa nditimbuud. Sawa to yesņa Mose tipul Isip, Maaron igham yaghur tae ivot leso ipoon di ve ipatoņ di pa ataam. Ve yes tisob tineep ila yaghur tae tonowen samba, ve tisob timbut Te Kaviaaņa ve tivooll tila pa paņa ite. *Igham 13:21+, 14:22+*

² Yaghur tae ve te tonowen ņgara, nene inimale yes Israela tigham ya. Pasa, sawa tonenen ve ila, yes titaghon Mose pa ņgar toni, ve tigham nepoņ paghu. ³⁻⁴ Ve aniiņ ve ya to Maaron Avuvu igham padi, yes tisob tighan ve tighun. Ya tonowen ivotvot ila yaam to Maaron Avuvu to itaghon di pa laghoņ todi. Yaam tonowen, nene Krisi. *Igham 16:14+, 17:1+; Nam 20:1+*

⁵ Eemoghon muri, tamtoghon todi katindi tizoor Maaron aliņa. Tauto ate yabyab padi, ve irab di

timatmaat izi ndug balim.* *Nam 14:29+; Hib 3:17+; Jud 5*

⁶ Mbeb to ivot pa yes Israela pa sawa tonenen, nene inim patonjaan pait. Leso taghilaal, ve lolood igham pa mbeb samsamia tanimale yes malep. *Nam 11:4; Mbo 106:14*

⁷ Tovenen yam ambees pa maaron kaaromja inimale muun yes Israela pida tighami malep. Pasa, Maaron aliya isaav tovene: [Sawa to yes Israela tigharaat makau pa gol, ve tipait mbeb tonowen inimale maaron todi.]

“Ival tiina mboledi izi pa ghanghaniin ve ghunghunuun, ghero tipamundigin mogheraan toman ngar samsamia naol.”
Igham 32:6

⁸ Ve mataad samia tanimale ngavuun malep. Pasa, Israela pida tigham tovene, ve tamtoghon todi 23,000 timatmaat pa ndag ee moghon. *Nam 25:1+; Mbo 106:29; Syg 2:14*

⁹ Ve tatoov Tiina toit tapiri malep. Pasa muun, Israela pida tigham tovene, ve moot samsamiadi tivot, ve tighan di timatmaat. *Igham 17:2-7; Nam 21:5+; Mbo 95:9*

¹⁰ Ve tayou avood pa Maaron toman uraata toni malep. Pasa muun, Israela pida tigham tovene,

* **10:5:** Tamtoghon pida to Korin avaat tigham ngar tovene: Yes tigham ya wa, ve tighanghan pasa. Tovenen ighaze timalaan pa tutuun to Maaron, nene mbeb sorok. Pasa, ya to tighami, toman pasa to tighanghani, nene pale igharaat di ila Maaron mata. Eemoghon Paulus isaav pa yes Korin ighaze tinumeer ya ve pasa kat malep. Pasa, Maaron irau ighurghur di maau. Ighaze tizoor aliya, ye pale iwaghamun di raraate inimale muun iwaghamun nditimbudi.

ve anjela to irabrab tamtoghon, irab di timatmaat.
Nam 14:2-37

¹¹ Mbeb naol to tivot pa yes Israela pa sawa tonenen, nene tinim patonjaan pait. Timbood kamos to mbeb tonowen, leso ipatoot iit to aazne tavot pa sawa to Maaron ipasob mbeb to naol ne, ve tagharaat tauud. Pa vene, patanjani igham ghiit inimale muun igham yes Israela. *Ro 13:11; 1Pe 4:7*

¹² Tovenen ighaze tamtoghon eta inumeer tau ighaze iyoon tunja, ye irau ipatumi. Pa vene, itap ve igham sosor. *Ro 11:20*

¹³ Sa tovaan to ighaze ivot payam, nene tovaan ite maau. Tovaan tiam to naol ne, raratedi tinimale tovaan to moghon moghon ivotvot pa tamtoghon tisob. Ve yam irau anumeer Maaron. Pasa, tovaan to yam irau ambaada maau, nene ye irau ipuli ivot payam maau. Ve ighaze ipul tovaan eta ivot payam, nene pale ighur lemim ataam eta leso apaghau taumim pani ve ayoon ariana, ve alib pa tovaan tonenen. *1Kor 1:9; 1Tes 5:24; 2Pe 2:9*

*Taneep sagan pa maaron kaaromja toman ru-
mai todi*

¹⁴ Tovenen yam ndiran tiou, ngar to tambees pa maaron kaaromja, agharai malep. Aneep sagan pani. *Mbanj 15:20; 2Kor 6:16+; 1Yo 5:21*

¹⁵ Yam lemim ngar. Tovenen taumim irau angabiiz saveen to naghaze nasavia. ¹⁶ Sawa to taghun vaen ila rubruub, ve tapait Maaron pa poia toni, nene igham ghiit talup toman Kriisi, ve sinj toni inim leed. Ve mberet to tateeva ve taghani, tovene paam. Nene igham ghiit talup toman Kriisi, ve minda inim leed. *Mk 14:22+*

¹⁷ Ve mberet ee moghon to iit tasob taghani, tauto ipatoon ghiit ighaze iit tasob tanimale ngeu ee moghon anonja. Nene Kresi. *Yo 6:33+; Ro 12:5; 1Kor 12:13,27*

¹⁸ Matamim ingal ngar to yes Israela titaghoni pa watoonrau todi. Ighaze tigham mbeb eta inim watoonrau, nene timoz pida izala artaal, ve taudi tighan pida, leso yesja Maaron tilup di tinim ee moghon. *Wkp 7:15*

¹⁹ Ighaze tovene, pale tasaav vena pa maaron kaaromnja ve watoonrau to tamtoghon tighamgham padi? Nene mbeb tau? Maau. Maaron toit moghon to Maaron tau. *1Kor 8:4+*

²⁰ Watoonrau to yes to tikankaan pa Maaron tighamgham di ila rumai todi lolo, nene tigham di pa Maaron tau maau. Tigham di pa avuvu samsamiadi. Tovenen you naghaze yam ala toman di pa ngar todi tonowen malep. Pasa, ighaze ala toman di, nene inimale yamnja avuvu samsamiadi tonowen alup gham anim ee moghon. *Lo 32:17; Syg 9:20*

²¹ Aloonj. Yam irau aghun ila rubruub to Tiina toit, ve rubruub to avuvu samsamiadi paam ne maau. Ve yam irau aghan ila tonj to Tiina toit, ve aghan ila tonj to avuvu samsamiadi paam ne maau. *2Kor 6:15+*

²² Ighaze iit tagham tovene, nene pale tagham Ngeu Tiina ate yabyab kat. Pasa, ngar toni iyaryaan ighaze taghur lolood ve ngar toit isob ila pani moghon. Yam to aghanghan ve aghunghun ila rumai to maaron kaaromnja, agham ngar vena? Aghaze tapiriid ilib pa Maaron? *Lo 32:21; Mbo 78:58*

Iit irau tagham ngar to iuul nditaad ve ipait Maaron iza

²³ Tiam pida tisaav tighaze: “Yei irau nigham ngar to naol ne. Mbeb eta le ngalsekiinj maau.” Eemoghon ngar tisob tiuul ghiit maau. Ve ngar tisob tipalot ghiit maau. *1Kor 6:12*

²⁴ Iit irau tagham ngar pa tauud moghon maau. Iit irau tagham ngar pa nditaad paam, ve tatoova pa tauul di ve tapalot di pa ghurla todi. *Ro 15:1+; 1Kor 13:5; Pil 2:4+*

²⁵ Tovenen yam ataghon ngar tovene: Ighaze aghita mbeb eta minda ineep ila nal ina, yam aghason pani malep. Agholi ve aghani moghon. Agham ngar naol malep. *1Tim 4:4*

²⁶ Pasa, Maaron aliņa isaav ighaze:

“Taan toman mbeb tisob to tineep ila, nene to Ngeu Tiina.” *Mbo 24:1*

²⁷ Ve ighaze tamtoghon eta ighur ila to Krisi maau, ve ipoi gham pa ghanghaniinj, ve lolomim aghaze ala, nene poia. Ala lak. Ve sa aniiņ to ighaze tigham payam, yam aghani moghon. Aghason di pani malep. Pasa, ighaze tipaes payam tighaze mbeb tonenen inim pa rumai to maaron kaarom eta, ve aghani, nene pale agham ngar aghaze asosor ila Maaron mata. *Lu 10:7+*

²⁸ Eemoghon ighaze tamtoghon eta ipaes payam ighaze mbeb minda tonenen, nene watoonrau suruvu, ghoru yam aghani malep. Pasa, ighaze aghani, nene pale tamtoghon tonenen ighita ighaze yam agham sosor, ve igham ngar naol. *1Kor 8:7+*

²⁹ Onoon, ighaze aghan mbeb tonenen, yam pale ayamaan taumim aghaze agham sosor ila Maaron

mata maau. Eemoghon yam irau agham ngar pa itamim tonenen. Ighaze ighita gham aghan mbeb tonenen, nene pale ighita ighaze yam agham sosor, ve igham ngar naol. Eemoghon ighaze tamtoghon eta isavia saveen tovene pait maau, iit irau tataghon tauud gabizoon toit pa sa mbeb to poia ve samia. Pughu vena to nataghon gabizoon to ngeu ite? *Ro 14:14+*

³⁰ Ighaze you naghan mbeb tonenen toman lolog poia pa Maaron, pughu vena to tamtoghon ite iyou avo payou? *Ro 14:6; 1Tim 4:3+*

³¹ Tovenen ighaze yam aghan, ma aghun, ma agham sa ngar ite paam, nene poia. Eemoghon sa ngar to aghami, yam irau aghami pa apait Maaron iza. *Kol 3:17; 1Pe 4:11*

³² Tovenen yam irau agham ngar pa yes Yuda, ve yes Grika to tighur ila maau ne, ve lupuun to Maaron paam. Agham ngar eta to pale ireu ngar todi malep. Agham ngar to denja moghon ila tamtoghon tisob matadi. *Ro 14:13+; 1Kor 8:13; 2Kor 6:3*

³³ Leso ataghon ngar tiou. Aghita. You naghham ngar pa taug maau. Sawa isob, natoova pa naghham ngar to popoia moghon ila tamtoghon tisob matadi. Ve naghham ngar to pale iuul di, lesu Maaron igham mulin di. *Ro 15:2; 1Kor 9:19+*

11

¹ Tovenen yam irau ataghon ghou pa ngar tiou, inimale you nataghon Krisi pa ngar toni. *1Kor 4:16+; Pil 3:17; 2Tes 3:7+*

Tagharaat tauud vena pa sawa to surjuun?

² You napait gham pa ngar tiam to sawa isob matamim ingalngal ghou, ve akis Maaron aliņa to nasavia payam ne ariņa. Saveeņ tonenen, you naghami ila to tamtoghon pida, ve anag nasakia ilat tiam. *2Tes 2:15; 2Tim 1:13+*

³ Ve aazne, naghaze yam awatag kat tovene: Krisi, ye inim daba pa nditamoot tisob, ve nditamoot tinim daba pa ndizwadi. Ve Maaron to inim daba pa Krisi. *Mbnp 3:16; Ep 1:22, 5:23; 1Pe 3:1,5*

⁴ Ighaze tamoot eta ipoon daba pa mbeb eta, ve isuņ ma ivotia Maaron aliņa pa tamtoghon ini-male propet, nene ipamayanin daba toni, nene Krisi. ⁵ Ve ndiliva to tipoon dabadi maau, ve tisuņ ma tivotia Maaron aliņa tinimale propet, nene yes tipamayanin daba todi, nene ndizwadi.*

Ndiliva tovene tinimale ndiliva samsamiadi to tiin dabadi, lesa tipamayanin di. ⁶ Tovenen ighaze liva eta ipakur tau ve ipoon daba maau, nene poia pa tiin daba. Lesa maya pa ngar to ye ighami, ve ipuli. Ve ighaze liva eta maya pa tikot daba raua izi, ma tiin daba, ye irau ipoon daba.

⁷ Eemoghon nditamoot irau tipoon dabadi maau. Pasa, yes tigham Maaron nagho, ve tineep pa tipait Maaron iza ve tipatoon tapiri ve poia toni. Ve ndiliva tineep pa tipait ndizwadi. *Mbnp 1:26+*

* **11:5:** Yes Korin ngar todi tovene: Ighaze ndiliva tipoon dabadi, nene ipatoon di ighaze yes ndiliva popoiadi to tineep ila ndizwadi sambadi. Ve ighaze liva eta ipoon daba maau, nene ipatoon ighaze ye nasolo tidi, ve lolo pa ineep ila azuwa samba maau. Grika tidi ledi ataam ru to tipoon dabadi. Eez, nene tikau uli pida ila dabadi inimale guduun. Ve ite, nene tipul dabadi raua itub tiina, ve timbuula ve tipoosa izala dabadi.

⁸ Aghita. Muuŋ kat, tamoot ivot ila to liva maau. Liva ivot ila to tamoot. ⁹ Ve Maaron igham n̄gar pa liva ve ighur tamoot ne maau. Ye igham n̄gar pa tamoot, tauto ighur liva pa iuuli. *Mbnp 2:18+;*

1Tim 2:13

¹⁰ Pughu tonene to yes ndiliva irau tipoon dabadi. Leso tipatooŋ taudi tighaze yes tineep ila ndizwadi sambadi, ve n̄gar todi den̄ja ila yes aŋela matadi.†

¹¹ Eemoghon iit ndiliva ve nditamoot to taneep ila to Tiina toit Kriŋi, irau taneep leed leed maau. Nditamoot ve ndiliva irau tiwaulan di. ¹² Agham n̄gar pa Adam yesuru Eva. Papazogi, liva ivot ila to tamoot. Ve aazne, nditamoot tivotvot ila to ndiliva. Pasa, ndiliva to tipoop di. Eemoghon Maaron to inim pughu pa mbef tisob. ¹³ Yam taumim irau aŋgabiiz mbef tonene. Ighaze alup gham pa sun̄uun̄, ve liva eta ipoon daba maau ve isun̄ pa Maaron, nene den̄ja? ¹⁴ Saveeŋ tiou tonene itaghon iit gabuaad paam. Ighaze n̄geu eta daba raua tiina, nene taghita taghaze n̄geu tonenen ipamayan̄in tau. ¹⁵ Ve ighaze liva eta daba raua tiina, nene ighami paghuna ila tamtoghon matadi ve tipaiti. Daba raua tonowen, nene Maaron igham pani, lesu ipoon daba. ¹⁶ Ighaze tamtoghon eta izoor alin̄ag tonene, nene you nasaav pani tovene: Yei lemai n̄gar ite paam pa mbef tonene maau. Ve yei moghon maau. Lupuun̄ tisob to Maaron titaghon n̄gar ee moghon pa mbef tonene.

Yes Korin tiwaghamun n̄gar to ghaniin̄ pasa

† **11:10:** Sawa to iit talup ghiit pa sun̄uun̄, yes aŋela tinepneep toman ghiit paam. Ughita Epesus 3:10 ve 1Pet 1:12.

¹⁷ Yo, naghaze napasaluᅅgan gham pa ᅅgar tiam pida to denjadi maau. Irau napait gham maau. Pasa, sawa to alup gham pa suᅅuuᅅ, suᅅuuᅅ tiam iuul gham maau. Iwaghamun gham.

¹⁸ Saveeᅅ to naghaze nasavia payam muuᅅ, nene vene: You naloᅅᅅ varumim tighaze sawa to alup gham pa ghanghaniᅅ ve suᅅuuᅅ, yam avalag gham aneep lemim lemim, ve awazoran gham pa savsaveeᅅ. Ve naghaze saveeᅅ tonene, avaat onoon. *1Kor 1:10+, 3:3*

¹⁹ Ngar tiam to avalag gham aneep lemim lemim, poia maau. Eemoghon ᅅgar tovene irau ivot. Leso tawatag: Sei masin to Krisi tamtoghon toni kat, ve ᅅgar todi denja ila mata. *1Yo 2:19*

²⁰ Sawa to alup gham pa suᅅuuᅅ, yam ataghon ghanghaniᅅ to Tiina toit ᅅgara maau. ²¹ Pasa, yam agham ᅅgar pa nditamim ve asaᅅan di maau. Yam pida matamim ghanghaniᅅ, ve amuuᅅ ala agham amim amim ve aghan. Ve tamtoghon tiam pida tighun tiina le tisami. Tauto nditamim pida to tinim muri, adi aniᅅᅅ maau ve pitool di.

²² Vena, irau aghan ve aghun izi taumim ruum tiam maau? Ma aghaze aveleg lupuuᅅ to Maaron ve apamayaᅅin nditamim pida to mbolaᅅa ne? Pale nasaav vena payam? Aghaze napait gham pa ᅅgar tiam tonanan? Maau kat! *Yems 2:5+*

Paulus ipit saveeᅅ to pasa muul

(Mt 26:26+; Mk 14:22+; Lu 22:17+)

²³ Saveeᅅ to naghami ila to Tiina toit ve muuᅅ nasavia payam, tauto aazne nasavia muul. Saveeᅅ tovene: Mboᅅ to Yudas ighur Yesu ila koia nimadi, Yesu igham mberet, ²⁴ ve ipait Maaron

pani. Ghoru iteeva ve isaav ighaze: “Nene you mindag. You pale napul taug namaat payam. Ngar to naghami ne, matamim kisini ve ataghoni. Leso matamim injal ghou.” ²⁵ Tighan le isob, ghoru itaghon ngar raraate pa rubruub vaen. Ighami ve isaav padi ighaze: “Rubruub tonene, nene sin tiou to pale imalin ve ipariaan saveen mbuaan to ataam paghu to pale Maaron yesna tamtoghon toni tilup di tinim ee moghon. Sawa isob to ighaze yam aghun ila rubruub tonene, ghoru ataghon ngar to you naghami ne, leso matamim injal ghou.” *Igham 24:3+; Hib 8:8+, 9:15+*

²⁶ Saveen tonenen, ngara tovene: Sawa isob to aghan mberet tonenen ve aghun ila rubruub vaen, yam avotia mateen to Tiina toit. Yam irau agham tovene ila ila le irau mulaan toni.

²⁷ Tovenen tamtoghon to ighaze ighan mberet ve ighun ila rubruub to Tiina toit, ve igham ngar to denja pa ngar to pasa maau,‡

nene ye igham sosor pa Tiina toit minda ve sini. ²⁸ Tovenen tamtoghon irau tingabiiz poian taudi, ghoru tighan mberet ve tighun ila rubruub. *2Kor 13:5*

²⁹ Pasa, mberet ve vaen, nene iza to Tiina toit anoja. Tovenen ighaze tamtoghon eta ighilaal mbep tonene maau, ve ighani ma ighuni inimale mbep sorok, nene ye igham sosor. Tamtoghon tovene, Maaron pale ighur atia pani. ³⁰ Pughu tonene to tamtoghon tiam katindi timomoroon ve

‡ **11:27:** Yes Korin tigham ngar naol to denja pa ngar to pasa maau. Pasa, sawa to tighan pasa, yes tilup lolodi inim ee moghon maau. Tivalag di tineep ledi ledi, ve tiveleg nditadi pida to mbolaaja.

tapiridi isob. Ve pida, timaat wa. ³¹ Ve inimale tanjabiiz tauud pooi ve taghan pasa, tone Maaron irau ighur atia tovene pait maau. ³² Eemoghon ighaze ye injabiiz ghiit ighaze tagham soso; ve ilos ghiit pa ipasalungan ghiit, nene poia. Pa vene, takis ngar samia toit, ve sawa to Mbonj Muri, ye ighur atia pait, ve itinja ival tiina to taan talaleed. *Mbo 94:12+; 2Kor 7:10; Hib 12:7+; Syg 3:19*

³³ Tovenen yam tonvetaz tiou, ighaze alup gham pa ghanghaniin ve sunuun, asanan nditamim ve yam asob aghan raraate. ³⁴ Ve ighaze tamtoghon eta pitool matini, nene poia pa ighan pataghaan izi ruum toni. Le isob, ghoru ilat pa lupuun tiam. Leso sawa to alup gham, agham soso ila Maaron mata sob, ve ye ighur atia payam malep. You leg saveen pida inepneep sone. Eemoghon irau nasavia aazne maau. Taug nalat peria, ghoru nasavia.

12

Maaron Avuvu irei uraat ve ngar naol naol pait

¹ Yam tonvetaz, uraat ve ngar naol naol to Maaron Avuvu irei di pait ne, you naghaze yam akankaan padi malep.

² Matamim ingal imuul ila pa muun, sawa to yam akankaan pa Maaron. Sawa tonenen, tiweu gham ala, ve asunsun pa maaron kaaromja to tisavsaav maau. *Mbo 115:4+; 1Tes 1:9*

³ Tovenen you naghaze nasaav ghazonja payam tovene: Tamtoghon to Maaron Avuvu igham pooz pani, ye irau ipiyaav saveen samia injarua Yesu maau. Ve tamtoghon eta irau isaav sorok ighaze: “Yesu, ye Tiina” ne maau. Maaron Avuvu igham

pooz pani, ghero isaav tovene toman lolo. *Mt 16:17; 1Yo 4:2+*

⁴ Maaron Avuvu ireirei uraat ve ngar naol naol pait. Uraat ve ngar tisob tonowen, nene Avuvu ee moghon to inim pughu padi. *Ro 12:6+; Ep 4:11+; Hib 2:4*

⁵ Iit tataghon ataam naol pa Mbesoonj toit itaghon ataam naol. Eemoghon tasob tambees pa Tiina ee moghon, nene Yesu. ⁶ Ve Maaron ee moghon to ipapalot ghiit tasob, tauto taghamgham uraat naol naol ila ye tau tapiri.

⁷ Maaron Avuvu ineep toman iit tasob, ve ireirei tau tapiri toman uraat ve ngar naol naol irau ghiit, lesu tapalot lupuuñj to Krisi pani. *1Kor 14:26; 1Pe 4:10+*

⁸ Tamtoghon eez, Maaron Avuvu ipaghazonjani pa Maaron ngar toni, lesu ivotia ngar tonowen pa tamtoghon. Ve ite, Maaron Avuvu igham le ngar popoia pida, lesu ipatoot tamtoghon pani. ⁹ Ve ite, Maaron Avuvu ee moghon to ipalot ghurla toni le iyaryaanj kat. Ve ite, Maaron Avuvu igham le tapiri, lesu iuul moroghoonja ve tinidi popoia. *Mk 16:17+; 1Kor 13:2; Yems 5:14*

¹⁰ Ve ite, ye le tapiri to igham mbbeb ghara-toonjadi tivot. Ve ite, ye ivovotia Maaron aliña pa tamtoghon inimale propet. Ve ite, ye irau ighilal mbbeb to tivotvot: Maaron Avuvu inim pughu padi, ma avuvu ite paam? Ve ite, Maaron Avuvu ipamundigini ve iwasavsav. Tauto tamtoghon tiloonj saveenj toni, eemoghon tikankaan pa pughu. Ve ngeu ite, Maaron Avuvu ipaghazonjani pa saveenj tonowen pughu, lesu ivotia pa tamtoghon ve tighazonjani. *Ro 12:6; 1Kor*

13:1-2, 14:2+

¹¹ Ngar ve uraat naol tonowen, Avuvu ee moghon to inim pughu padi. Ye ireirei di irau iit enaenā itaghon tau lolo. *Hib 2:4*

Iit to taneep ila lupuuŋ to Kriŋi, tanimale Kriŋi anoŋa pida pida

¹² Iit tawatag: Anonāad, nene ee moghon. Ve ye le babaŋa naol inimale nimaad, agheed, mataad, ve mbeb pida paam. Eemoghon anonāad babaŋa to naol ne, tilup di tinim mbeb ee moghon. Lupuuŋ to Kriŋi, nene ŋgara raraate. *Ro 12:4+; 1Kor 10:17*

¹³ Aghita, iit tamtoghon naol naol. Pida, yes Yuda, pida Grika. Pida, mbesoonā. Ve pida, mbesoonā maau. Tinŋin taudi. Eemoghon sawa to tagham ya, ila uraat to Maaron Avuvu ee moghon, iit tanim Kriŋi le. Ve Avuvu tonowen ilup ghiit tanim Kriŋi anoŋa ee moghon. Ve Maaron igham Avuvu ee moghon pa iit tasob. Avuvu tonowen inim ya mata yaryaara pait ve ipapalot ghiit. *Yo 7:37+; Ga 3:28; Kol 3:11*

¹⁴ Iit tawatag: Anonāad, babaŋa ee moghon maau. Ye le babaŋa katindi. ¹⁵ Aghita. Ighaze tamtoghon eta aghe igham ŋgar ighaze: “You nanim ŋgeu tonene nima, ghorō poia. Eemoghon maau. Tauto irau nalup toman anoŋa maau.” Pale irau ipul ina, ve ila ineep sagan? Maau. Pasa, ye ŋgeu tonenen anoŋa pida. ¹⁶ Ve ighaze ŋgeu tonenen taliŋa igham ŋgar ighaze: “You nanim ŋgeu tonene mata, ghorō poia. Eemoghon maau. Tauto irau nalup toman anoŋa maau.” Pale irau ipul ina, ve ila ineep sagan? Maau. Pasa, ye ŋgeu tonenen

anoŋa pida. ¹⁷ Ve vena? Ighaze anoŋaad babaŋa tisob titoor di tinim mataad moghon, pale irau talooŋ saveeŋ? Ma ighaze titoor di tinim taliŋaad moghon, pale irau tayaaz mbeb vuzi? Maau.

¹⁸ Iit anoŋaad venen maau. Maaron itaghon tau lolo, ve ighur anoŋaad babaŋa to naol ne, lesu tigham uraat todi todi. ¹⁹ Aghita. Ighaze anoŋaad babaŋa tisob titoor di tinim babaŋa eta moghon, pale taghita taghaze nene tamtoghon anoŋa? Maau. ²⁰ Anoŋaad, ye le babaŋa katindi. Ve babaŋa tisob tilup di tinim mbeb ee moghon.*

²¹ Tovenen mataad irau iveleg nimaad ve isaav ighaze: “Ah, you leg uraat eta payom maau!” Isaav vene malep. Ve dabaad tovene paam. Irau isaav tovene pa agheed maau. Pasa, anoŋaad babaŋa tisob, ledi uraat. ²² Ve agham ŋgar pa mbeb pida to tineep ila lolood inimale ateed ve kodkodaad. Onoon, taghita mbeb tonowen taghaze arianaadi maau. Eemoghon ledi uraat tintina. Ighaze tineep maau, nene pale tamaat. ²³ Anoŋaad babaŋa pida to taghaze popoia pa tamtoghon tighita di maau ve mayaad padi, nene tapakur di. Pasa, moghon moghon mataad ingalŋgal di, ve taponpoon di. ²⁴ Eemoghon anoŋaad babaŋa pida to popoia pa tamtoghon tighita di, nene tagham ŋgar tovene padi maau. Tapul di tineep sorok. Maaron ighur anoŋaad babaŋa to naol ne, ve ilup di tinim ee moghon. Ve anoŋaad babaŋa pida to taghita di taghaze mbeb sorok ve ledi izadi maau,

* **12:20:** Saveeŋ to Paulus isavia pa anoŋaad, nene iza to lupuuŋ to Krisi. Pasa, Maaron Avuvu ilup Krisi tamtoghon toni tinim ee moghon, ve ireirei uraat ve ŋgar naol naol irau di, lesu tipalot lupuuŋ to Krisi.

nene ye ipait di tilib pa anonaad babaņa pida.
²⁵ Maaron igham tovene, leso anonaad babaņa tiwazoran di ve tivalag di sob. Ye ighaze tilup di tinim ee moghon, ve matadi pa taudi ve tiwaulan di.

1Kor 1:10-12

²⁶ Iit tawatag: Ighaze anonaad babaņa eta iyamaan yabyabuņ, nene pale anonaad isob iyamaan yabyabuņ. Ve ighaze tipait anonaad babaņa eta, nene pale anonaad babaņa tisob lolodi poia ve tinidi iza.

²⁷ Lupuņ tiam, nene inimale Krişi anona. Ve yam asob animale anona tonenen babaņa pida. *Ro 12:5+*

²⁸ Lupuņ to Krişi, Maaron ighur yes mbaņooņa pa timuņ pani, ghero yes to tinim propet ve tivotia Maaron aliņa pa tamtoghon. Ve inim tol pani, nene yes to tipatoot tamtoghon pa Maaron aliņa. Ghero yes to tighamgham mbeb gharatoonjadi, ve yes to Maaron irei tapiri padi leso tiuul moroghoņa, ve yes to tighamgham uraat pa ulaaņ nditadi, ve yes to ledi ņgar pa ņginiņ uraat, ve yes to Maaron Avuvu ipamundigin di ve tiwasavsav. *Ep 2:20, 4:11+*

²⁹ Vena? Tamtoghon tisob tinim mbaņooņa to Krişi? Ma tisob tinim propeta ve tivotia Maaron aliņa pa tamtoghon? Ma tisob tipatoot tamtoghon pa Maaron aliņa? Ma tisob tigham mbeb gharaatoonjadi? ³⁰ Ma Maaron irei tapiri pa tamtoghon tisob leso tiuul moroghoņa? Ma Maaron Avuvu ipamundigin tamtoghon tisob, leso tiwasavsav? Ma irau tisob tivotia saveeņ tovene pughu? Maau. ³¹ Tovenen Maaron Avuvu irei uraat ve ņgar naol naol pait. Ve yam irau azuaria gham pa ghamuņ

uraat ve n̄gar to iuul katin lupuuñ to Krisi. Yo, naghaze nasavia n̄gar eez to poia kat ilib pa n̄gar to naol ne. *1Kor 14:1*

13

N̄gar to lolood pa tamtoghon, nene ilib pa n̄gar to naol

¹ Ighaze you irau nasaav ila ndug ndug aliñadi, ma añela aliñadi, eemoghon lolog pa tamtoghon maau, nene you nanimale belo ma ambam to itañ sorok toman aliña tiina. ² Ve ighaze navotia Maaron aliña pa tamtoghon nanimale propet, ve naghazooñ pa n̄gar toni yonğaañ isob, ve nawatag katin n̄gar popoia tisob, ve ghurla tiou iyaryaañ kat le irau nasaav moghon, ve lolooz tinduur tighau tila, nene poia. Eemoghon ighaze lolog pa tamtoghon maau, nene you nanim mbeb sorok. *Mt 17:20; 1Kor 12:8+,28*

³ Ve ighaze narei mbeb tiou tisob pa yes mbolaaña, ve napul taug nala Maaron koia nimadi, ve tighur ghou nala yab ighan ghou, eemoghon lolog pa tamtoghon maau, pale naghām sa inim leg atia? Mbeb eta maau.

⁴ N̄gar to lolood pa tamtoghon, nene vene: Tagham poian tamtoghon, ve ighaze tigham patañani pait, nene pale tatatan tauud, ve tambaada moghon. Ve ighaze taghita nditaad ledi mbeb katindi, nene irau ireu lolood maau. Ve tapait tauud ve taghaze talib pa nditaad maau. *1Pe 4:8*

⁵ Ve tagham n̄gar eta isosor ila tamtoghon matadi maau, ve mataad ingal tauud moghon maau. Ve ateed yabyab soroksorok maau, ve mataad kisin

sosor to tamtoghon maau. *Ro 13:10; 1Kor 10:24,33; Pil 2:4*

⁶ Ve ngar to ighaze denja maau, nene pale tiniid iza pani maau. Ve sa saveen ma ngar to onoon, nene pale lolood poia pani. *Mbo 15:2+; Ro 12:9; 1Pe 1:22; 3Yo 3-4*

⁷ Ve sa ngar to ighaze ivot, nene irau tapul muriid pa tamtoghon maau. Sawa isob, iit pale tanu-meer Maaron, ve taghur ila ariana taghaze ye pale igham mbeb tisob tivot pooi. Ve sa patanani to ighaze ivot pait, nene pale tayoon ariana ve tambaada. *Ro 15:1; Ga 6:2; 2Tim 2:24*

⁸ Ngar to lolood pa tamtoghon, nene irau isob maau. Inepneep irau sawa isob. Eemoghon ngar to votiaan Maaron aliņa inimale propet, muri pale Maaron ipasobi. Ve ngar to Maaron Avuvu ipamundigin ghiit ve tawasavsaav, nene pale isob. Ve uraat to Maaron Avuvu ighamghami, lesu ipaghazonan ghiit pa ngar pida, nene paam pale isob. ⁹ Aghita. Iit tagham ngar iraua sone. Ve Maaron aliņa to tavotia pa tamtoghon tanimale propet, tovene paam. Tasavia pida pida moghon. *1Kor 8:2+*

¹⁰ Ve tala tala le ighaze sawa to mbeb anoņa kat ivot, nene pale Maaron ipasob ngar tisob to aazne tagham pida, ve pida taghami sone ne, ve tilaledi. *Ep 4:13; Pil 3:12*

¹¹ Muun, sawa to pain ghou, saveen toman ngar ve gabizoon tiou, nene inimale to ndipain. Eemoghon aazne, nanim olman, ve ngar tiou

imatu wa. Tauto napul ngar to ndipain ineepie.*

¹² Aazne, iit taghita mbeb to Maaron ighazoon kat maau. Nene inimale taghita mbeb tonowen anunudi ila tiroon to ngalaanja maau. Eemoghon muri, itiņa Maaron pale tawaghiton ghiit. Aazne, naghām ngar pida moghon. Ve muri, you pale nawatag kat, inimale Maaron iwatag katin ghou. *2Kor 3:18; 1Yo 3:2; Syg 22:4*

¹³ Tovenen ngar tintina tol to tinepneep: ngar to ghurla, ngar to ghuruun mataad pa Maaron, ve ngar to lolood pa Maaron ve tamtoghon. Ve ngar tol tonene, ngar to imuun, nene ngar to lolood pa Maaron ve tamtoghon. *Kol 1:4+; 1Tes 1:3, 5:8; 1Yo 4:16*

14

Ngar to votiaan Maaron aliņa inimale propet, nene ilib pa ngar to Maaron Avuvu igham ghiit tawasavsaa

¹ Tovenen yam azuaria gham pa ngar to lolood pa Maaron ve tamtoghon, toman ngar ve uraat tisob to Maaron Avuvu irei di pait ne. Ve ngar eez to yam irau azuaria gham pani kat, nene ngar to tavotia Maaron aliņa pa tamtoghon tanimale propet. ² Pasa, tamtoghon to Maaron Avuvu ipamundigin di ve tiwasavsaa, yes tisavsaa pa tamtoghon maau. Tisavsaa pa Maaron. Ve saveen

* **13:11:** Paulus isavia saveen tonene iza to tau. Eemoghon saveen tonene injarua yes Korin. Pasa, ngar naol to yes Korin tighamgham di, nene ipatoon di ighaze tigham ngar to Krisi iraua sone (1Kor 3:1). Paulus ighita ighaze ngar to lolood pa Maaron ve tamtoghon, tauto mbeb tiina kat. Ilib pa ngar to naol. Eemoghon yes Korin titaghon ngar tovene iraua sone.

to tisavia, nene pughu iyoonj. Tauto tamtoghon tiloonja ve tikankaan pani. ³Eemoghon yes to tivotia Maaron aliña tinimale propet, tisavia saveenj to tamtoghon irau tiloonja ve tighazoonj pani. Tauto tipalot nditadi ve tiseenj ngar todi, ve tirab atedi leso lolodi poia, ve tipariaan di pa titaghon ngar poia. ⁴Tamtoghon to Maaron Avuvu ipamundigin ve iwasavsaav, ye ipalot ival tiina maau. Ipalot tau moghon. Ve ighaze ngeu eta ivotia Maaron aliña inimale propet, ye ipalot yam asob to aneep ila lupunj to Krisi, ve iseenj ngar tiam.

⁵ You naghaze Maaron Avuvu ipamundigin gham asob ve awasavsaav, ghoru poia. Eemoghon ighaze yam asob avotia Maaron aliña pa tamtoghon animale propet, nene pale poia kat. Tovenen ighaze Maaron Avuvu ipamundigin tamtoghon eta ve iwasavsaav, ye irau ivotia saveen tonenen pughu paam. Leso ipalot lupunj to Krisi ve iseenj ngar todi. Ve ighaze maau, nene uraat to votiaan Maaron aliña pa tamtoghon inimale propet, to poia kat le ilib pa ngar to Maaron Avuvu ipamundigin ghiit ve tawasavsaav. *Nam 11:26-29*

⁶ Yam tonvetaz, ighaze you nalat, ve Maaron Avuvu ipamundigin ghou ve nawasavsaav, nene pale nauul gham vena? Maau. You irau navotia mbep pida to Maaron ipaghazonan ghou pani, ma naseen ngar tiam pa ngar pida, ma napatoot gham pa ngar pida, ma navotia Maaron aliña payam nanimale propet, ghoru nauul gham. Pasa, ighaze nasavia saveenj tovene, yam pale aghazoon pa pughu.

⁷ Agham ngar pa mbep pida to tigharaat di leso titañ, inimale sab ve gita. Mbep tonowen, taudi

irau titan maau. Tavib di, ma tarab di, ghoru titan. Eemoghon ighaze titan pooi maau, nene pale tawatag mbouñ aliña vena? ⁸ Ve tavuur to tivibi pa malmal ne paam, ighaze itañ pooi maau, nene pale sei igharaat tau pa malmal? ⁹ Yam tovene paam. Ighaze awasavsaav ve asavia saveeñ to tamtoghon tighazoon pani maau, nene pale tigham ñgar pa saveeñ pughu vena? Maau. Saveeñ tiam pale inim yaghur. ¹⁰ Onoon, tamtoghon to tineep izi taan ne, aliñadi naol. Ve aliñadi tonowen, tisob ledi pughudi. Tovenen sei to ighaze iwatag ndug eta aliñadi, nene pale ighazoon pani. ¹¹ Eemoghon ighaze tamtoghon eta isavsaav, ve you nawatag aliña maau, nene pale yeru niwaghiton ghei inimale ye to ndug ite, ve you to ndug ite. ¹² Yam tovene paam. Aazne, azuaria gham pa uraat ve ñgar naol to Maaron Avuvu irei di pait. Nene poia. Eemoghon yam irau azuaria gham kat pa uraat ve ñgar to ipalot lupuuñ to Kri.

¹³ Tovenen ighaze Maaron Avuvu ipamundigin tamtoghon eta ve iwasavsaav, ye irau ighason Maaron pa iuuli leso itoor saveeñ tonowen, ve ndita tiloña ve tighazoon pa pughu. ¹⁴ Ighaze you nasuñ, ve Maaron Avuvu ipamundigin ghou ve nawasavsaav, nene Maaron Avuvu to ineep ila lolog, tauto isavsaav. Eemoghon saveeñ to nasavia, nene iuul ñgar tiou maau. ¹⁵ Tovenen pale naghama vena? You pale nalup rugharu. Sawa pida to nasuñ, Maaron Avuvu to ineep ila lolog ne isavsaav. Ve sawa pida, nasuñ ve ñgar tiou ighazoon pa saveeñ to nasavia. Ve sawa pida to nambou mbouñ to sunuñ, Maaron Avuvu to

ineep ila lolog ne imbou. Ve sawa pida, nambou ve n̄gar tiou ighazoon pa mboun to namboui. *Ep 5:19; Kol 3:16*

¹⁶ Aghita. Ighaze tamtoghon eta ilat ilup toman gham pa sunuun, ve Maaron Avuvu ipamundigin ghom ve upait Maaron pa poia toni toman lolom poia, ve tamtoghon tonenen ikankaan pa saveen tiom pughu, nene pale iyok pani ighaze: “Onoon” vena? Maau. Pasa, saveen to usavia, ye ikankaan pa pughu. ¹⁷ Onoon, yom usavia saveen poia ve upait Maaron pa poia toni. Eemoghon saveen tiom irau ipalot tamtoghon tonenen maau.

¹⁸ You lolog poia pa Maaron ve napaiti pasa, nawasavsaav le nalib pa yam asob. ¹⁹ Eemoghon sawa to naneep toman Maaron tamtoghon toni pa sunuun, you naghaze nasavia saveen to tamtoghon tisob irau tiloonja ve tighazoon pani. Ighaze nasavia saveen waaro liim moghon to tamtoghon tighazoon padi, nene pale poia ve ilib pa saveen waaro ndinndin ndinndin (10,000) to tamtoghon tikankaan padi. ²⁰ Yam tonvetaz, agham n̄gar inimale ndipain n̄gar geegeu muul malep. Yam anim ndolman wa. Tovenen yam irau agham n̄gar matua animale ndolman. Eemoghon n̄gar samia, ghoru aneep saganuun pani animale ndipain geegeu. *Ro 16:19+; 1Kor 3:1; Ep 4:14+; Hib 5:12+*

²¹ Maaron alinja isaav tovene: Muun, Maaron ate yabyab pa yes Israela, ve isaav padi ighaze:

“You pale naghama ndiran to ndug ite to alinjadi ite, tinim ve tingin tamtoghon tiou tonene, ve navotia alinag padi ila ndiran tonowen avodi. Eemoghon alinag to tisavia, yes Israela pale irau tiloonja maau.” *Is*

28:11+

²² Saveen tonene ipatoon ghiit ighaze ngar to tawasavsaav, nene inim ghilaloon pa yes to tighur ila ne maau. Nene inim ghilaloon pa yes to tighur ila sone, leso ipamundigin ngar todi. Ve ngar to votiaan Maaron aliņa inimale propet, nene inim ghilaloon pa yes to tighur ila sone ne maau. Nene inim ghilaloon pa yes to tighur ila, ve ipatoon di ighaze Maaron ineep toman di.

²³ Aghita. Ighaze alup gham pa surjuun ve yam asob awasavsaav, ve tamtoghon pida to tighur ila sone ve tikankaan pa Maaron, tilat ve tineep toman gham pa surjuun, nene pale tighita gham, ve tighaze yam awaghamgham animale borouņa!

²⁴ Eemoghon ighaze tamtoghon eta tovene iloon ilat, ve iloon gham asob avotia Maaron aliņa animale propet, ve asavia saveen to ye ighazoon pani, nene pale saveen tiam ingali, ve ighami ighilaal sosor toni ve atia to pale iza toni. *Yo 16:8; Mban*

2:13

²⁵ Tamtoghon tonenen pale iyamaana ighaze ngar isob to iyoon ila lolo, yam asavia ivot ighazoon wa. Tovenen ye pale itap izi taan, ve ipait Maaron iza, ve isaav ighaze: “Onoon kat, Maaron inepneep toman gham.”

Ataam to surjuun ilaan denja

²⁶ Tovenen yam tonvetaz, pale tasaav vena? Sawa to alup gham pa surjuun, yam asob agham uraat le irau gham. Ngeu eez, ye imbou mbou pa ipait Maaron. Ve ite, ye ipatoot gham pa Maaron aliņa. Ve ite, ye isavia ngar yongaan pida to Maaron ipaghazonani pani. Ve ite, Maaron Avuvu ipamundigini ve iwasavsaav. Ve ite, ye ivotia saveen

tonenen pughu. Ve sa ngar to aghaze aghami, yam irau aghami pa apalot lupuunj to Krisi. *Ro 14:19; 1Kor 12:7+; Ep 4:12*

²⁷ Ighaze Maaron Avuvu ipamundigin tamtohton ve tiwasavsaav, ival irau tisaav maau. Tamtohton ru ma tol, nene iraua. Ve sawa to aghaze asaav, yam irau asaan nditamim. Tamtohton eez isavsaav le isob, ghoru tamtohton ite ana. Ve tamtohton eta irau ivotia saveenj todi pughu, leso ival tiina tighazonj pani. ²⁸ Ve ighaze tamtohton eta irau ivotia saveenj todi pughu maau, nene irau tisaav alijadi tiina ila lupuunj to Krisi maau. Nenejadi moghon, ve tisavsaav toman Maaron ila lolodi.

²⁹ Yes to tivotia Maaron aliija tinimale propet, tovene paam. Tamtohton ru, ma tol tisavsaav le isob, ghoru yam pida angabiiz saveenj todi: Denja, ma maau? *Mbanj 17:11; 1Tes 5:20+; 1Yo 4:1*

³⁰ Ve ighaze tamtohton eta isavsaav, ve tamtohton ite ineep ve Maaron ivotia ngar eta pani, nene ye to isavsaav ne, irau neneja ve ighur soso pa ita ite ana isavsaav. ³¹ Tovenen yam to avotia Maaron aliija animale propet, irau ataghon ngar tovene: Tamtohton eez isavia saveenj toni le isob, ghoru ite ana isaav. Leso aseenj ngar to tamtohton tisob ve apalot di. ³² Aloonj. Ighaze ngeu eta lolo ipamundigini ighaze ivotia Maaron aliija inimale propet, ye irau itatan tau, ve isaan le ita ite ipasob saveenj toni, ghoru ana isaav. ³³ Pasa, Maaron toit, ye Maaron to ighamun mbeb maau. Ye ighaze mbeb tisob tilaan denjadi moghon. Ve ye ighaze iit tasob talup ghiit tanim ee moghon ve tataghon ngar luuma. Tamtohton tisob to Krisi titaghon

ngar tovene ila lupuunj todi todi.

³⁴ Ighaze yam alup gham pa sunjuun, ndiliva irau tisaav maau. Yes irau neneenadi moghon, ve titatan taudi, ve tineep ila nditamoot sambadi itaghon tutuunj to Maaron. *Ep 5:22; Kol 3:18; 1Tim 2:11+*

³⁵ Ighaze ledi ghasoniin pida, sawa to tila ruum, ghoru tighason ndizwadi. Pasa, ighaze liva eta isaav ila lupuunj tiam lolo, nene igham mayanjiina.*

³⁶ Laak, yam to azorzoor ghou ne, vena? Aghaze Maaron aliija ivot tiam muun, ghoru ila pa ndug pida? Ma aghaze yam moghon to Maaron aliija ilat ivot tiam? ³⁷ Aloonj. Ighaze tamtoghon eta igham ngar ighaze ye propet to Maaron ve itaghon ngar to Maaron Avuvu, nene ye irau ighilaal ighaze saveenj to nambooda payam, nene tutuunj to Tiina toit, ve iyok pani. *2Kor 10:7; 1Yo 4:6*

³⁸ Ve ighaze tamtoghon eta mata velegin saveenj tiou tonene, yam matamim ila pani malep.†

³⁹ Tovenen yam tonjetaz, azuaria gham pa ngar to votiaan Maaron aliija pa tamtoghon inimale propet. Ve yes to Maaron Avuvu ipamundigin di ve tiwasavsaav, yam angalsekin di malep. *1Kor 12:31; 1Tes 5:20*

* **14:35:** Yes Grika tighita tighaze saveenj to ndiliva tisavia, nene mbep to ival tiina maau. Nene mbep to ndizwadi moghon. Saveenj waaro tonene, pughu ighazoonj maau. Liva to isaav ila lupuunj to Krisi lolo, ye igham mayanjiina pa sei? Igham mayanjiina pa tau, azuwa tamoot, ma lupuunj to Krisi? † **14:38:** Ataam ite to tator saveenj tonene, nene vane: “Ve ighaze tamtoghon eta izoor saveenj tiou tonene, ye paam, Maaron pale izuruni.”

⁴⁰ Yam irau ataghon katin sunjuuŋ ngara to naol ne, leso sunjuuŋ tiam denja moghon ve ilaan pooi.

15

Krisi imaat ve imundig pa mateeŋ wa

¹ Yam tonvetaz, you naghaze napei ngar tiam muul pa varu poia to navotia payam ve aghami wa. Varu poia tonene, to aazne ayondyood ila.

² Varu poia to muuŋ navotia payam, ighaze aghur ila ve akisi tunja, nene pale inim ataam payam ve Maaron igham mulin gham. Eemoghon ighaze akisi maau, nene pale inim mbeb sorok, ve aghita ghurla tiam anoŋa maau. *Ro 1:16+, 11:22; Hib 3:14*

³ Saveeŋ tiina kat to muuŋ tisavia payou ve anag nasakia ilat payam, nene vene: Krisi, ye igham inaad ve imaat pa sosor toit itaghon Maaron aliŋa to timbooda. *Is 53:5+; Ga 1:4; 1Pe 2:24*

⁴ Ve titavia izila mateeŋa inadi ve mboŋ inim tol, ghoru Maaron ipamundigini pa mateeŋ. Nene paam itaghon Maaron aliŋa to timbooda. *Lu 24:46*

⁵ Sawa to imundig, ye ila ivot to Petrus muuŋ. Ghoru ila ivot to mbaŋooŋa toni tisob ve tighita. *Mk 16:14; Lu 24:34+; Yo 20:19*

⁶ Muri ghoru, ye ila ivot to tamtoghon toni irau 500 ve avua pida, ve tisob tighita. Ndiran tonowen, katindi tinepneep sone. Ve pida timaat wa.

⁷ Ghoru ivot to Yakobus* ve ighita. Ghoru ila ivot to mbaŋooŋa toni tisob. *Mbaŋ 1:3+*

* **15:7:** Yakobus tonene, nene Yesu tazi.

⁸ Yes mbanjoona toni tisob tighita ve inim inim le muri ghoru, ivot tiou ve anag naghita paam, ve isob. Onoon, ataam to ye igham ghou nanim mbanjoona toni, nene ite pa ataam to ye igham mbanjoona toni pida. You nanim tamtoghon to tina ipoopla ila sawa toni kat maau.† *Mbanj 9:3+; 1Kor 9:1*

⁹ Mbanjoona tisob to Krisi izadi ilib payou. Onoon, you mbanjoona toni paam. Eemoghon naghita taug naghaze you poiag irau to tiwaat ghou tighaze mbanjoona to Krisi maau. Pasa, muunj, naghur patajani naol pa lupuunj to Maaron. *Mbanj 8:3; Ga 1:13; 1Tim 1:13*

¹⁰ Eemoghon poia to Maaron itoor ghou, tauto nanim mbanjoona to Krisi ve aazne nataghon ngar toni. Poia toni iza tiou sorok maau. Ighur anoja. Pasa, you naghham katin uraat le nalib pa mbanjoona tisob. Eemoghon you taug maau. Poia to Maaron ineep tiou, tauto ipapalot ghou ve naghhamgham uraat tonene. *2Kor 11:5,23, 12:11+; Kol 1:29*

¹¹ Tovenen ighaze you, ma mbanjoona pida nivotia varu poia pa tamtoghon, nene yei nisob nisasavia saveej tovene pa mateej ve mundigiinj to Yesu Krisi. Ve saveej tonene, tauto yam aloona ve aghur ila.

Maaron pale ipamundigin yes mateeja

† **15:8:** Sawa to Yesu ineepneep izi taan, mbanjoona toni pida tilaghaagh tomani. Tovenen tighita uraat toni ve mateej toni paam. Ve sawa tonenen, Yesu ighur di tinim mbanjoona toni. Eemoghon Paulus, ye ilaagh toman di maau. Yesu imuul iza ila pa sambam, ve muri ghoru, ivot to Paulus ve ighuri inim mbanjoona toni.

¹² Yei nivovotia saveeņ pa tamtoghon tovene: “Maaron ipamundigin Kriſi pa mateeņ wa.” Ighaze venen, pughu vena to tiam pida tighaze Maaron irau ipamundigin yes mateeņa maau? *Mbaņ 2:32+, 4:33, 5:30+*

¹³ Aghita. Ighaze saveeņ todi onoon, ve mateeņa irau timundig maau, nene Kriſi paam, Maaron ipamundigini pa mateeņ maau. ¹⁴ Ve ighaze Maaron ipamundigin Kriſi pa mateeņ maau, saveeņ to yei nivovotia, nene saveeņ sorok. Le anoņa maau. Ve ghurla tiam paam, mbeb sorok. ¹⁵ Ve mbeb ite. Ighaze Kriſi imundig pa mateeņ maau, nene yei tonene nigham kaarom payam pa Maaron iza. Pasa, nipariaaņ tamtoghon pa tighur ila tighaze Maaron ipamundigin Kriſi pa mateeņ. Eemoghon ighaze saveeņ tiam tonanan onoon, ve mateeņa irau timundig maau, nene Kriſi paam, Maaron ipamundigini pa mateeņ maau. ¹⁶ Nayol aliņag muul. Ighaze saveeņ tiam onoon, ve mateeņa irau timundig maau, nene Kriſi paam, Maaron ipamundigini pa mateeņ maau. ¹⁷ Ve ighaze Maaron ipamundigin Kriſi pa mateeņ maau, ghurla tiam, nene mbeb sorok. Le anoņa maau. Ve sosor tiam inepneep sone. ¹⁸ Ve yes to tighur ila to Kriſi ve timaat, yes paam tilaledi wa. ¹⁹ Iit taghurghur mataad pa mundigiņ to yes mateeņa ve nepooņ poia to pale Kriſi igham pait. Eemoghon ighaze saveeņ to nepooņ tonowen, onoon maau, ve taghurghur mataad pani sorok, nene takaria tauud wa. Pasa, sawa to taneep izi taan, iit tambaad patañani naol. Tovenen tamtoghon avaat lolodi isamin ghiit ilib pa tamtoghon tisob to taan to tineep sami ne.

²⁰ Eemoghon maau! Maaron ipamundigin Krisi pa mateenj wa. Ye inimale aniiñ mata to imatu ila uum muuñ. Pasa, ye to imuunj pa mateeña tisob to pale timundig. *Mbanj 26:23; Kol 1:18; 1Pe 1:3; Syg 1:5*

²¹ Aghita. Muuñ, ñgeu eez to inim ataam pa mateenj ivot. Mundigiin to yes mateeña tovene paam. Ñgeu eez to inim ataam pani ve ivot. Nene Krisi. *Mbnp 3:1-19; Yo 11:25; Ro 5:12+*

²² Iit tamtoghon to tavot ila to Adam, tasob taneep ila sosor toni lolo. Tauto iit tasob tamatmaat. Ve yes to tinim Krisi le ve tineep tunja ila toni, tovene paam. Muri, Maaron pale ipamundigin di tisob, ve tineep matadi iyaryaar. ²³ Eemoghon tamtoghon tisob pale titaghon sawa todi todi. Krisi to imundig pa mateenj muuñ. Ve tala tala le sawa to ighaze ye imuul inim, ghoru tamtoghon toni tisob anadi timundig. *1Tes 4:15+*

²⁴ Mbeb tonowen isob, ghoru taan sawa ivot, ve ye pale ipasob yes pooza, ve daba tisob to izadi tintina, toman mbeb tisob to tapiridi tintina, le tisob tilaledi. Ghoru ipul uraat to ghamuunj pooz imuul ila Tama Maaron nima. ²⁵ Pasa, Krisi pale igham pooz itaghon Maaron ñgar toni le irau itatan koia ve tapiridi isob kat, ve ivazag di ila aghe samba. *Mbo 110:1; Mt 22:44; Hib 1:13*

²⁶ Ve koia to pale ipasobi muri kat, nene mateenj. *Syg 20:14, 21:4*

²⁷ Maaron aliña to timbooda, isaav ighaze: “Maaron ighur mbeb tisob tineep ila ye samba wa.” Onoon, saveenj tonene isaav ighaze mbeb tisob tineep ila Krisi samba. Eemoghon Maaron, ye ineep ila Krisi samba maau. Pasa, ye to ighur

mbeb tineep ila Krisi samba. *Mbo 8:6; Mt 28:18; Hib 2:8; 1Pe 3:22*

²⁸ Muri, sawa to mbeb tisob tineep denjadi ila Natu samba, Natu pale ighur tau ila Tama Maaron samba. Leso Maaron inim daba pa mbeb tisob, ve injin di.

²⁹ Laak, naghaze naghason gham. Ighaze mateeṅa irau timundig maau, pughu vena to yam pida aghaze agham mateeṅa tiam inadi, ve tigham ya payam? Agham ṅgar tonanan pasa? Pale iuul di vena? ³⁰ Ve pughu vena to sawa isob, yei nimbadaad patanani pa Krisi iza, ve nireirei taumai pa ndaab. *Ro 8:36; 2Kor 11:26*

³¹ Yam tonvetaz, yam agham ghou lolog poia. Pasa, uraat tiou ighur anoṅa ivot ila lolomim ve anim Tiina toit Yesu Krisi le wa. Ila ye mata, you nasaav ghazooṅa payam naghaze: Mateeṅ inajarua ghou irau sawa isob. *2Kor 4:10+*

³² Ighaze you nataghton ṅgar to tamtoghon moghon pa uraat to naghamghami ne, pughu vena to narei taug, ve yeiṅa mbeb sagsaṅa niparab izi ndug Epesus? You naghaze naghama sa kat, to nambaad patanani tonowen? Ighaze mateeṅa irau timundig maau, tambaṅa. “Taghanghan, taghunghun, ve takaal leed nepoon poia izi taan. Pasa, bozo ma mbonru, ghoru tamatmaat.” *Mbanj 19:23+; 2Kor 1:8*

³³ Yam apatum gham. Apul tamtoghon titombaan gham malep!

“Pasa, ighaze iit to tataghton ṅgar poia ne, talup toman ndiran samsamiadi, nene pale tiyes ghiit pa ṅgar todi, ve ṅgar toit isami paam.”

³⁴ Ngar tiam iwaghamgham iraua! Agham ngar pool, ve apul ngar samia ineep, ve ataghon ngar to denja ila Maaron mata. You nasaav gha-zoonḡa payam: Mayamim. Pasa, yam pida awatag Maaron rita maau.

Anoḡaad papaghu pale ariḡadi, ve irau tisami maau

³⁵ Yo. Ngeu eta pale ighason ghou tovene: “Ighaze Maaron ipamundigin yes mateeḡa, pale ipamundigin di vena? Ve sawa to timundig, pale igham ledi anoḡadi papaghu to ghitoonḡadi vena?”

³⁶ Yom borou! Lem ngar maau! Ughita. Ighaze tavazog mbeb eta uve, nene pale uli imbuuz ve ilale, ghoru paghu toni itub iza. *Yo 12:24*

³⁷ Ve ighaze tavazog wit, ma mbeb ite paam uve, nene pale paghu toni to muri itub iza ne, ghitoonḡa raraate inimale uuv to tavazogi ne maau. Pale ghitoonḡa ite. ³⁸ Ve Maaron igham mbeb to tavazog di ne titub tiza, ghoru eeḡaḡa tighur ayadi, bogadi, rauadi, runḡudi, ve anoḡadi itaghon ye tau ngar toni.

³⁹ Mbeb to tineep izi taan ne, mindadi raratedi maau. Iit tamtoḡhon mindaad ite, ḡgai todi ite, man todi ite, ve iigh tovene paam, mindadi ite.

⁴⁰ Ve mbeb to tineep ila sambam paroḡania ne, anoḡadi ite. Ve mbeb to taan, anoḡadi ite. Mbeb to sambam paroḡania paghunadi, ve mbeb to taan paghunadi paam. Eemoghon yes raratedi maau.

⁴¹ Ndag ḡguruba, nene ite pa kaiyo ḡguruba. Ve pitum tovene paam. Ngurubadi ite pa ndag ve kaiyo ḡgurubadi. Ve pitum tisob raratedi maau. Pitum eeḡaḡa ḡgurubadi ite ite.

⁴² Mundigiinj to yes mateeja, nene ngara raraate. Ighaze tamaat ve titavia ghiit, nene anojaad izila taan ve imbuuz ve ilale. Eemoghon sawa to Maaron ipamundigin ghiit pa mateeja, ye pale igham leed anojaad papaghu. Anojaad papaghu tonenen pale ariajadi, ve irau tisami maau.

⁴³ Anojaad to titavia izila taan, nene ghitooja poia kat maau. Eemoghon muri, sawa to Maaron ipamundigin ghiit pa mateeja, ye pale igham leed anojaad to popoia kat, ve ngurubadi tiina. Anojaad to titavia izila taan, ye le tapiri maau. Eemoghon sawa to Maaron ipamundigin ghiit pa mateeja, ye pale igham leed anojaad papaghu to tapiridi tintina. *Mt 13:43; Pil 3:20+; Kol 3:4*

⁴⁴ Anojaad to titavia izila taan, nene mbeb to taan. Eemoghon sawa to Maaron ipamundigin ghiit pa mateeja, ila Maaron Avuvu tapiri, iit pale tagham leed anojaad to sambam.

⁴⁵ Maaron aliija to timbooda, isaav ighaze:

“Adam, ngeu to Maaron ighuri muun, imundig inim tamtoghon, ve mata iyaryaar.” *Mbnp 2:7*

Ve Adam ite to ivot muri,‡
ye avuvu to igham ghiit taneep mataad iyaryaar le alok. *Yo 5:21,24; Ro 5:15+*

⁴⁶ Tovenen ngeu to sambam imuun maau. Ngeu to taan toman taan nepooja to imuun. Ghoru ngeu

‡ **15:45:** Adam ite to ivot muri, nene Kri. Ves 47 iwaata ighaze: “Adam ite to inim ru pani.” Saveej tonene, ngara tovene. Adam to ivot muun, iit tasob tavot ila toni. Ye pughu toit. Tovenen sawa to ye igham sosor, iit taneep ila sosor tonowen lolo paam. Kri tovene paam. Ye inim pughu pa lupuun paghu, nene tamtoghon toni. Yes to tinim Kri le, tineep ila mateeja ve mundigiinj toni lolo.

to sambam inim toman nepooŋ paghu to Maaron Avuvu. ⁴⁷ Adam to ivot muoŋ, Maaron igharaata pa taan. Tovenen ye tamtoghon to taan. Ve Adam ite to inim ru pani, ye ineep sambam ve izi inim.

Mbnp 3:19; Yo 3:13,31

⁴⁸ Tamtoghon tisob to taan, anooŋadi ve nepooŋadi, nene tinimale ŋgeu to taan to Maaron ighuri. Ve yes to pale tineep izi ndug sambam, anooŋadi papaghu ve nepooŋadi, nene tinimale Ŋgeu to ineep sambam ve izi inim. ⁴⁹ Aazne, nepooŋ toit, taneep tanimale ŋgeu to taan to Maaron ighuri. Ve muri tovene paam. Nepooŋ toit pale inimale nepooŋ to Ŋgeu to ineep sambam ve izi inim. *Ro 8:29+; 1Yo 3:2*

⁵⁰ Yam toŋvetaz, you nasaav payam tovene: Anooŋaad to taan, nene irau igham nepooŋ to ndug sambam maau. Pasa, mbef to ndug sambam irau tisami maau. Tovenen mbef to isamsami inimale anooŋaad to taan, nene irau igham nepooŋ to ndug tonowen maau. Maaron igham leed anooŋaad papaghu, ghoru iit irau tagham nepooŋ tonowen. *Yo 3:5+*

Maaron igham ghiit talib pa mateen

⁵¹ Aloooŋ. You naghaze napaghazoŋan gham pa mbef eez to muoŋ iyoŋ ve aazne Maaron isavia ivot ighazoŋ. Tamtoghon toit pida pale timaat maau. Pasa, sawa to Mboŋ Muri, Maaron pale itoor ghiit tasob, ve tagham anooŋaad papaghu.

⁵² Tavuur to Maaron ighuri pa itaŋ muri kat, pale itaŋ, ve rikia moghon Maaron ipamundigin yes mateeŋa, ve igham ledi anooŋadi papaghu to irau tisami maau. Ghoru iit to tamaat sone ve tanepneep ne, anaad Maaron pale itoor ghiit, ve igham

leed anonaad papaghu. *Mt 24:31; Pil 3:21; 1Tes 4:15+*

⁵³⁻⁵⁴ Pasa, anonaad to taan to tisami ve timatmaat, Maaron irau itoor di. Leso tinim paghu, ve irau tisami, ma timaat muul maau. Mbeb tonene ighaze ivot, nene pale Maaron aliņa waaro eez to timbooda, anona ivot. Isaav ighaze: “*Maaron iparab ariņa, tauto ilib pa mateeņ tapiri ve ipasobi le isob kat.*” *Is 25:8*

⁵⁵ “Mateeņ, tapirim to ulib payei ineeep sine?”

O mateeņ, iiz tiom to unġal ghei pani ne, ineeep sine? Maau.” *Hos 13:14*

⁵⁶ Pasa, iiz to mateeņ, nene nġar samia. Ve nġar samia ighamgham tapiri ila tutuun. *Mbnp 3:3; Ro 4:15, 5:12+, 7:9+*

⁵⁷ Eemoghon iit tapait Maaron toman lolood poia! Pasa, ila uraat to Tiina toit Yesu Krisi, Maaron igham ghiit talib pa nġar samia ve mateeņ. *Ro 8:37; 2Kor 2:14; 1Yo 5:4+*

⁵⁸ Tovenen yam tonvetaz to lolog payam kat, you nasaav payam: Ayoon ariņa, akis ghurla tiam tunġia, ve apul taumim kat pa uraat to Tiina toit irau sawa isob. Pasa, yam awatag: Ighaze ye ineeep toman gham pa uraat tiam, yam arab taumim sorok pa uraat maau. Uraat tiam pale ighur anona. *Ga 6:8; Hib 6:10; Syg 14:13*

16

Paulus ipalot yes Korin pa tiuul nditadi to tineep izi Yerusalem

¹ Yo, you leg saveeņ ris payam pa yaam to aghaze anġooga pa Krisi tamtoghon toni to tineep izi Yerusalem. You naghita naghaze ataam to naghuri pa lupuun to Maaron to tineep izi taan

suruvu to Galesia, yam ataghoni paam, ghero poia. *Mbanj 24:17; Ro 15:25+; 2Kor 8:1+*

² Wik to naol ne, ndag to ivot muun, yam enaena irau aghur yaam tiam pida ila sagan itaghon uraat tiam atia. Leso ivot inim tiina, ve isanan pa sawa to natal. Ataghon alinag tonene, ghero poia. Pasa, ighaze natal peria ve angooga sone, nene pale poia maau. *Mbanj 20:7*

³ Ve aghur tamtoghon tiam pida to aghita di aghaze tiraua, lesa tigham yaam to angooga ne ila to tonvetaz toit to tineep izi Yerusalem. Sawa to natal, you pale nambood rau pida tinim paesiin padi, lesa tikis di ve tila. ⁴ Ve ighaze naghita naghaze poia pa you paam nala, nene pale yeina nila.

Paulus ipaesia laghoon toni

⁵ You naghama ngar naghaze nala naghita nditaad pida to tineep irau taan suruvu to Masedonia. Tovenen you pale nala naghita di muun. Le isob, ghero natal naghita gham. ⁶ Ve naghaze naneep toman gham mala ris. Tovenen matag ingal naghaze naneep toman gham le sawa to ndug yauna isob, ghero yam irau aghita ghou pa laghoon tiou, ve aghur ghou nala pa ndug sine to naghaze nala pani. ⁷ Lolog pa nangig gham moghon ve nala maau. Tovenen ighaze Maaron lolo tovene, nene pale itina taneep mala ris. ⁸ Eemoghon irau nala Masedonia rikia maau. Pale naneep izi ndug Epesus le irau lupuun tiina to Pentekos ivot, ghero nala. ⁹ Pasa, Maaron ikaak ataam payou pa naghama uraat tiina izi sualen. Ve naghita naghaze uraat tiou ighurghur anona. Eemoghon ival tiina

tizorzoor saveeņ tiou paam. *2Kor 1:16; Kol 4:3; Syg 3:8*

Paulus ipaes padi pa Timoti ve Apolos

¹⁰ Ighaze aghita Timoti ilat peria tiam, yam aghami toman lolomim poia. Leso sawa to ineep toman gham, imatughez sob, ve lolo poia. Pasa, ye ighamgham uraat to Tiina toit Kriši, raraate inimale you. *1Kor 4:17*

¹¹ Tovenen tamtoghon eta mata izi pani malep. Ve sawa to ye ipamundigin laghoon toni muul, yam auuli, ve aghuri ila toman lolo poia, ve imuul inim tiou. Pasa, you nasasaņani toman toņvetaz toit pida.

¹² Toņvetaz toit Apolos, sawa naol, you nasavsav ariana pani naghaze yesņa toņvetaz toit pida tilat tighita gham. Eemoghon lolo pa ilat pa sawa tonene maau. Pale ighita soso eta, ghoru ilat ighita gham.

Paulus ipasob saveeņ toni

¹³ Matamim imosmoos ve ayoon ariana pa ghurla tiam. Amatughez malep. Apariaaņ taurimim, ve ayoon tuņia. *Mbo 31:24; Ep 6:10*

¹⁴ Ve sa ņgar to aghaze aghami, yam aghami itaghon ņgar to lolood pa tamtoghon. *1Kor 13:1+; 1Pe 4:8*

¹⁵⁻¹⁶ Yam awatag: Stepanas ve yes to tineep tomani ila ruum toni, timuun pa yam Akaia asob, ve tighur ila to Kriši muun. Ve yes tirei taudi pa uraat to Tiina toit, ve timbesmbees kat pa tamtoghon toni. Ndiran tovene, toman tamtoghon tisob to tiuluul di ve tipul taudi kat pa uraat to

Maaron, you naghaze napalot gham pa aneep ila sambadi, ve aloon aliñadi. *1Kor 1:16; Pil 2:29; 1Tim 5:17; Hib 13:17*

¹⁷ Sawa to Stepanas toman Portunatus ve Akaikus tinim tivot tiou, yes tigham lolog poia kat. Onoon, yam ival irau anim maau. Eemoghon yes tigham naghomim ve tinim tivot, ve tiuul ghou pa mbeb pida. ¹⁸ Tauto tipalot ghou ve tigham ateg izi, inimale moghon moghon tighamgham payam. Tamtoghon tovene, yam irau apait di.

¹⁹ Lupuun tisob to Krisi to tineep izi taan suruvu to Asia ne, tigham ndag poia todi ilat payam. Akwila yesuru Prisila toman yes to tiluplup di pa sunuun ila ruum todi ne, lolodi payam kat. Tovenen yes paam tigham ndag poia todi ilat payam ila Tiina toit iza. *Mban 18:2,18,26; Ro 16:3,5*

²⁰ Ve tonvetaz to Krisi to yeiña ninepneep ne paam, tisob tigham ndag poia todi ilat payam.

Yam asob tonvetaz to Krisi. Tovenen lolomim poia pa taumim ve awakisin nimamim. *Ro 16:16*

²¹ Nene you Paulus. Nambood ndag poia tiou tonene ilat payam pa taug nimag. *Kol 4:18; 2Tes 3:17*

²² Ighaze tamtoghon eta lolo pa Tiina toit maau, nene pale mbalmbali to Maaron iza toni.

O Tiina tiei, unum lak!*

²³ Poia to Tiina toit Yesu ineep toman gham.

²⁴ You lolog pa yam asob. Pasa, Yesu Krisi ilup ghiit ve taneep ila toni.

* **16:22:** Paulus imbood saveen waaro tonene ila yes Aramea aliñadi. Ighaze: 'Marana ta.'

Maaron Saveen Toni Patabuan
The New Testament and portions of the Old Testament
in the Oov Dialect of the Saveeng language of Papua
New Guinea. The Saveeng language is also called Mutu
or Mutu-Tuam.

Sampela hap Buk Baibel long tokples Saveeng Oov
long Niugini

copyright © 2011 Wycliffe Bible Translators, Inc.

Language: Saveeng (Mutu)

Dialect: Oov

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 22 Feb 2024 from source files dated 31 Aug 2023

c7a45d99-91a2-564f-9c55-d2efc8be7fae